

LE OLOMATAMATA

FAASILASILAINA LE MALO O IEOVA



SU'ESU'EGA

ME 5-11

**Le Auala e
Faatumau ai le
Agaga Faataulaga**

ITULAU E 7 • PESE: 61, 25

ME 12-18

**Le Auala e
Faatumau ai se
Vaaiga Sa'o**

ITULAU E 12 • PESE: 74, 119

ME 19-25

**Ia Faamamaluina
Tagata Matutua**

ITULAU E 20 • PESE:
90, 135

ME 26-IUNI 1

**Ia Tausia Ē
Matutua**

ITULAU E 25 • PESE:
134, 29






AUSETALIA

PITO I LUMA: Nisi o Molimau a Ieova i Ausetalia o loo faimalaga atu i nofoaga maotua, e faalauiloa le tala lelei i tagata o loo nonofo ma galulue i lafumanu i vaipanoa maotua

FAITAU AOFA'I O TAGATA
23,192,500

TAGATA TALA'I
66,967

FAATUPULA'IA O PAEONIA



SU'ESU'EGA

■ Le Auala e Faatumau ai le Agaga Faataulaga

O loo tatou feagai ma se fili ilogatā e mafai ona aveesea ai lo tatou agaga faataulaga. O le a talanoaina i lenei mataupu pe faapefea ona iloa lenā fili, ma le auala e faaaogā ai le Tusi Paia e fesoasoani iā i tatou e fesaga'ia ai lenā fili.

■ Le Auala e Faatumau ai se Vaaiga Sa'ο

E fesoasoani le iai o se vaaiga sa'ο e tatou te tumau ai i le tapua'iga iā Ieova. Aiseā ua lofitūina ai nisi i manatu sesē? O le a talanoaina i lenei mataupu, pe faapefea ona tatou faaaogā le Tusi Paia e fesoasoani iā i tatou e faatumau ai se vaaiga sa'ο iā i tatou lava.

■ Ia Faamamaluina Tagata Matutua

■ Ia Tausia Ē Matutua

O loo faamatalaina i nei mataupu tiute tauave a Kerisiano ta'itasi ma faapotopotoga, i tagata matutua i le upu moni, faapea tauaiga ua matutua. O le a iloiloina ai fo'i nisi o fautuaga aogā e fesoasoani iā te oe e faataunuu ai na tiute tauave.

O LOO IAI FO'I I LENEI LOMIGA

3 Ia Pā'ia Loto o Tauaiga lē Talitonu

17 Tapua'iga a le Aiga—Pe e Mafai Ona Fiafia le Auala e Faia Ai?

30 O Lau Upu—'Ioe ma le Leai'?



Ia Pā'ia Loto o Tauaiga lē Talitonu

NA FETALAI Iesu: “Ia e alu i lou fale i lou aiga, ma faamatala atu iā i latou mea uma ua faia e Ieova mo oe, ma lona alofa mutimutivale iā te oe.” O le taimi lenā atonu o loo iai Iesu e latalata i Katara, i le itu i saute i sasa'e o le Sami o Kalilaia, o loo talanoa atu i se tamāloa na fia avea ma ona soo. E faailoa mai ai i lenā mea, na malamalama lelei Iesu i le uiga masani faaletagata, e mana'o e faailoa atu se manatu tāua i ona tauaiga.—Mare. 5:19.

E masani ona tatou vaaia lenā vala i aso nei, ma e iai nisi aganuu e sili atu ona matilatila ai lenā tulaga. O lea, pe a avea se tasi ma tagata tapua'i o Ieova, e masani ona mana'o e faailoa atu i ona tauaiga ona talitonuga fou. Ae faapefea ona ia faia lenā vala? E faapefea ona ia pā'ia loto o ona tauaiga e ese a latou tapua'iga? Ua iai i le Tusi Paia nisi o fautuaga aogā.

“UA MA MAUA LE MESIA”

O se tasi i le ulua'i senituri na muamua mātauina Iesu o le Mesia, o Aneterea. O ai na vave lava ona ia ta'u atu i ai le mea na ia iloa? “Ona ia [Aneterea] alu atu loa lea ma maua ai lona uso o Simona, ma fai atu i ai: ‘Ua ma maua le Mesia’ (o lona uiga pe a faaliliuina, o le Keriso).” Na ta'ita'ia atu e Aneterea Peteru iā Iesu, ma maua ai e Peteru le avanoa e avea ai ma soo o Iesu.—Ioa. 1:35-42.

Ina ua mavae le ono tausaga a o nofo Peteru i Iopa, na valaaulia ai o ia e alu atu i Kaisareia, ina ia asiasi i le fale o le ta'ita'ia'u o Konelio. O ai na maua atu e Peteru i le fale o Konelio? “O loo faatalitalia i latou [Peteru ma ē na latou faimalaga faatasi] e Konelio, ma ua faapotopoto faatasi lona 'auaiga ma ana uō mamae.” Na valaaulia e Konelio lona 'auaiga e faalogologo a o talanoa mai

“E lē tatau ona tatou faamalosia i latou e o mai i le upu moni, ma faamatala atu i taimi uma o tatou talitonuga.”—Jürgen

Peteru, ona fai lea o la latou faai'uga e tusa ma mea ua faalogologo i ai.—Gal. 10:22-33.

O le ā e tatou te a'oa'oina mai iā Aneterea ma Konelio i le auala na la feutaga'i ai ma o la tauaiga?

E le'i umi se taimi na faatalitali ai Aneterea ma Konelio. Na ta'ita'ia atu e Aneterea Peteru iā Iesu, ma sa faia e Konelio fuafuaga uma ina ia faalogologo ai ona tauaiga iā Peteru. Peita'i, e la te le'i faamalosalia pe faia ni togafiti ina ia avea ai o la tauaiga ma soo o Keriso. O le ā se lesona? Atonu e mafai ona tatou faailoa atu nisi o o tatou talitonuga i tauaiga lē talitonu, pe saunia fo'i ni avanoa e mafai ona latou faalogo ai i le upu moni, pe faatasi ai ma uso talitonu. Peita'i, e tatau ona tatou faaaloologia la latou sa'olotoga e filifili ai, ma 'alofia le taumafai e faamalosalia i latou. Ina ia faata'ita'ia le auala e fesoasoani ai i o tatou tauaiga, ia iloilo le faaa'oa'oga a se ulugalii mai Siamani, o Jürgen ma Petra.

Na su'esu'e Petra ma Molimau a Ieova, ma papatiso mulimuli ane ai. O lana tane o Jürgen, e iai sona tulaga maualuga i le vaega'au. Sa lē fiafia muamua o ia i le filifiliga a lana avā. Peita'i, na ia iloa mulimuli ane o loo tala'ia e Molimau a Ieova upu moni mai i le Tusi Paia. Na tuuina atu fo'i lona ola iā Ieova, ma ua avea nei o ia ma toeaina i le faapotopotoga. O le ā lana fautuaga e faatatau i le auala, e pā'ia ai le loto o se tauaiga e ese lana tapua'iga?

Ua faapea mai Jürgen: "E lē tatau ona tatou faamalosalia i latou e o mai i le upu moni, ma faamatala atu i taimi uma o tatou talitonuga. O le faia faapea, o le a atili ai ona latou lē fiafia i le upu moni. O le auala sili ona aogā, o le faailoa atu i ai ma le faautauta o ni nai faamatalaga lāiti mai i lea taimi i lea taimi. E lelei fo'i ona taumafai e faamāsani o tatou tauaiga i uso ma tuafāfine, e latou te tupulaga faatasi pe e tutusa mea e fiafia i ai. O le faia faapea o le a latou iloa ai, e leai se eseese tele o Molimau a Ieova mai iā i latou."

'E maua i'uga lelei pe a faaalua pea le onosa'i.'—Roswitha

Na vave ona tali atu Peteru ma tauaiga o Koneilio i le fe'au o le Tusi Paia. O nisi i le ulua'i senituri na faalogo i le upu moni, ae na umi se taimi ona faato'ā faia lea o sa latou filifiliga.

AE FAAPEFEA USO O IESU?

O nisi o tauaiga o Iesu, na latou faatuatua iā te ia i le taimi o lana faiva i le lalolagi. O se faata'ita'iga, atonu o aposetolo o Iakopo ma Ioane o ni tausoga o Iesu, ma o lo la tinā o Salome o le uso o le tinā o Iesu. Atonu na aofia ai o ia i 'isi fafine e to'atele, o ē na auaua iā Iesu ma le 'auaposetolo i a latou meafaitino.'—Luka 8:1-3.

Ae e iai nisi tauaiga o Iesu e le'i vave ona faatuatua iā te ia. O se faaa'oa'oga, ina ua mavae le tausaga talu ona papatiso Iesu, sa iai le motu o tagata i se fale e faalogologo atu iā Iesu. Ae ina "ua faalogo lona aiga i le mea ua tupu, ona o mai lea e manana'o e pu'e iā te ia, auā ua latou faapea ane: 'Ua faalētonu lona mafaufau.'" Mulimuli ane, na talanoa atu ona 'afa uso iā te ia e faatatau i ana faigāmalaga, ae e le'i tali tuusa'o atu o ia. Aiseā? Talu ai "e le'i faatuatua ona uso iā te ia."—Mare. 3:21; Ioa. 7:5.

O le ā e tatou te a'oa'oina mai i le auala na feutaga'i ai Iesu ma ona tauaiga? E le'i ita Iesu ina ua latou faapea atu iā te ia ua faalētonu lona mafaufau. Ina ua mavae lona maliu ma lona toetū, na



ia avatu se faamaoniga i ona tauaiga e ala i le faa-ali atu i lona 'afa uso o Iakopo. O lenā mea, atonu na talitonu ai Iakopo ma isi ona 'afa uso o ia o le Mesia. O lea, na latou iai faatasi ma aposetolo ma isi i se potu pito i luga i Ierusalemā, ma faauuina ai i latou i le agaga paia. A o faagasolo taimi, e tele faaeaga matagofie na maua e Iakopo ma Iuta le isi 'afa uso o Iesu.—Gal. 1:12-14; 2:1-4; 1 Kori. 15:7.

O NISI E MANA'OMIA SE TAIMI UMI

E pei lava o le ulua'i senituri, o nisi tauaiga i aso nei e umi se taimi ona faato'ā ō mai lea i le upu moni. O se faaa'oa'oga, na matuā malosi Roswitha i le lotu Katoliko, ina ua papatiso lana tane ma avea ma Molimau a Ieova i le 1978. O le maumaua'i o Roswitha i ona talitonuga, na tete e ai i lana tane i le taimi muamua. Ae a o faagasolo tausaga, na faasolo ina tuutiitia teteega ma amata ai ona ia iloa, o loo a'oa'o e Molimau a Ieova le upu moni. O lea, na papatiso ai o ia i le 2003. O le ā na saosaolaumea i le suiga na ia faia? E le'i ita lana tane ina ua ia tete mai, ae na ia tuu atu iā te ia le avanoa e suia ai ona manatu. Na fautua mai Roswitha: 'E maua i'uga lelei pe a faaalua pea le onosa'i.'

Na papatiso Monika i le 1974, ae na papatiso lana fanau tama e to'alua i le sefulu tausaga mulimuli ane ai. E ui e le'i tete lana tane o Hans i lana tapua'iga, ae na faato'ā papatiso o ia i le 2006. Pe a toe mafaufau i mea na tutupu, o le ā le fautuaga na aumai e le aiga? "Ia faamaoni pea iā Ieova, ma aua le faagutugutulua i mataupu e fesiligia ai lo tatou faatuatua." Na tūa ona faamautinoa atu pea iā Hans lo latou alolofa iā te ia. Sa latou faamoemoe pea e iai se aso o le a ia talia ai le upu moni.

FAAFOUINA E ALA I LE VAI O LE UPU MONI

Na faamatala e Iesu le upu moni e pei o se vai e maua ai le ola e faavavau. (Ioa. 4:13, 14) E tatou te manana'o e faafouina o tatou tauaiga i le vai mālū ma le manino o le upu moni. E mautinoa e tatou te lē manana'o e faavaivaia i latou, e ala i le taumafai e soona avatu i ai o se vai i se

taimi puupuu. O le faavaivaia po o le faafouina o i latou, e faalagolago i le auala e tatou te faamatala atu i ai o tatou talitonuga. Ua faapea mai le Tusi Paia, "o le loto o lē e amiotonu e mafaufau loloto ina ia tali atu," ma "o le loto o le tagata atamai e māfua ai ona faaalua e lona gutu le tofā mamao, ma e faatauānu fo'i ona laugutu." E faapefea ona tatou faatatauina lenā fautuaga? —Faata. 15:28; 16:23.

Atonu e mana'o se avā e faamatala atu ona talitonuga i lana tane. Afai e mafaufau loloto a o le'i tautala, o le a lē vave ona ia tali atu. O le a ia lē faaalua le faafiaamiotonu, ae o ana upu e mafaufau lelei o le a faafouina ai ma maua ai le filemu. O le mafaufau i fesili nei, o le a fesoasoani iā te ia e tautala ma gaoioi ai i se auala faautauta. O le ā le taimi e to'afilemu ai la'u tane ma faigofie ona talanoa ai iā te ia? O ā ni mataupu e fiafia o ia e talanoa ma faitau i ai? Pe e fiafia o ia i mataupu faapolitiki, faasaienisi po o taaloga? E faapefea ona faaosofia lona fiafia i le Tusi Paia, ae i le taimi e tasi e faaloalo i ona manatu ma ona faalogona?

Ina ia pā'ia loto o tauaiga lē talitonu, e lē uiga atu i le soona faamatala atu o le upu moni iā i latou i le taimi e tasi. O mea e tatou te tautatala atu ai, e tatau ona lagolagoina e a tatou amio.

AMIOGA LELEI

Na faapea mai Jürgen lea na ta'ua muamua: "Ia faaaauu pea ona faatatau ta'iala a le Tusi Paia i aso ta'itasi. O le auala sili lenā e mafai ai e tauaiga ona mātauina mai i tatou." Na faapea mai Hans, lea na faato'ā papatiso ina ua mavae le pe ā ma le 30 tausaga talu ona papatiso lana avā: "E tūa tele amioaga lelei a Kerisiano, ina ia iloa ai e tauaiga le aafia lelei o le upu moni i o tatou olaga." Ia iloa mai e o tatou tauaiga vala lelei o o tatou olaga, ua mafai ona faasea ai i tatou mai i isi.

Na aumaia e Peteru fautuaga tūa mo avā e ese tapua'iga a latou tane. "Ia gaua'i atu i a outou lava tane, ma afai e lē ususita'i nisi i le upu, e mafai ona maua i latou i le amiolelei a a latou avā e aunoa ma se upu, auā ua latou vāaitino i a outou amioaga mamā ma le matuā faaloalo. Aua fo'i ne'i

faia a outou teuga e tusa ai ma le vaaiga a tagata, o le fili lea o le lauulu ma teuteu i auro po o le ofu i ofu tele, ae o le tagata lilo i totonu, ia teu i le mea e lē pala o le agaga agamalu ma le filemu, o le mea tautele lava lea i le silafaga a le Atua.”—1 Pete. 3: 1-4.

Na tusi Peteru e mafai ona uuna’ia se tane i amioga lelei a lana avā. O le manatuaina o lenā tā’iala a le Tusi Paia, na taumafai ai se tuafafine e igoa iā Christa, e pā’ia le loto o lana tane e ala i lana amio talu mai ona papatiso i le 1972. E ui lava na iai se taimi na su’esu’e ai lana tane, ae e le’i faia lava sana filifiliga. Sa auai lana tane i nisi o sauniga ma e masani lelei fo’i i nisi i le faapotopotoga. Na faaaloogia fo’i e le faapotopotoga lana sa’olotoga e filifili ai. Na faapefea ona taumafai Christa e pā’ia le loto o lana tane?

“Ou te maumaua’i e tumau i le ala e finagalo i ai Ieova. Ae i le taimi e tasi, ou te taumafai e liliu mai la’u tane ‘e aunoa ma se upu,’ e ala i la’u amio lelei. Ou te taumafai e lolo atu i mea e mana’o ai la’u tane i vala e lē aafia ai mataupu silisili. Ou te faaaloogia lana aiā e filifili ai, ma ua ou tuu atu mea uma i aao o Ieova.”

“E tāua tele amioga lelei a Kerisiano, ina ia iloa ai e tauaiga le aafiaga lelei o le upu moni i o tatou olaga.”—Hans

O le faaa’oa’oga a Christa ua faaalua ai le tāua o le fetuutuuna’i. O loo faaaauu pea lana faasologa faaleagaga, e aofia ai le auai e lē aunoa i sauniga ma le faia o se sao maelega i le faiva. Na malamalama fo’i o ia i le tāua ma le tatau ona ua’i atu i lana tane, faali atu le alofa, ma faaalu se taimi faatasi ma ia. E tāua tele le malamalama ma le fetuutuuna’i, pe a feagai se tasi ma ona tauaiga lē talitonu. Ua faapea mai le Tusi Paia, “e iai le taimi e atofaina mo mea uma.” E aofia ai i lenā vala le tāua o le taimi e faaalu faatasi ma tauaiga, aemaise paaga e ese a latou tapua’iga. O le tele o taimi e faifaimea faatasi ai, e faaleleia ai fesoota’iga. E tusa ai ma mea na tutupu, e faaalua mai ai o le lelei o fesoota’iga e tuuitiitia ai faalogona fuā, tuua to’atasi ma le faaesea.—Fai. 3:1.

AUA NE’I MOU ATU LE FAAMOEMOE

Na faapea mai Holger, o lē na faato’ā papatiso lona tamā ina ua mavae le 20 tausaga talu ona papatiso isi o lona aiga: “E tāua ona faaalua le alofa i le tagata o le aiga ma tatalo pea mo ia.” Na ta’ua e Christa o loo ia faamoemoe pea e iai se taimi o le a auauna ai lana tane iā Ieova, ma talia le upu moni. E tatau ona iai pea se vaaiga sa’o ma faamoemoe e iai se taimi o le a talia ai e o tatou tauaiga le upu moni.

O lo tatou sini ia lelei pea la tatou faiā ma tauaiga lē talitonu, ia latou faalogo i le upu moni, ma ia pā’ia o latou loto i le fe’au o le Tusi Paia. E tatau fo’i ona tatou faia mea uma “faatasi ma le agamalu ma le matuā faaaloalo.”—1 Pete. 3:15.





Le Auala e Faatumau ai le Agaga Faataulaga

*“A fia mulimuli mai se tasi iā te a’u, ia faafitia
e ia o ia lava.”—MATA. 16:24.*

A O IAI Iesu i le lalolagi, sa ia faataatia se faaa’oa’oga lelei atoatoa o le agaga faataulaga. Sa ia faataulaga ona lava mana’oga ma faanaunauga ina ia faia ai le finagalo o le Atua. (Ioa. 5:30) O lona faamaoni se’ia oo ina maliu i le laau e faapuapuagatia ai, na faamaonia ai e leai se mea na gata mai ai lona faanaunauga e faaalua le agaga faataulaga.—Fili. 2:8.

² E mana’omia ona tatou faaalua le agaga faataulaga i le avea ai ma soo o Iesu. O le uiga o le faaalua o le agaga faataulaga, o se tagata e lotomalie e faafitia ona lava mana’oga ina ia fesoasoani ai i isi. E tuufaafegagai lenā uiga ma le uiga manatu faapito. **(Faitau le Mataio 16:24.)** O le agaga faataulaga, e fesoasoani iā i tatou e faamuamua ai mana’oga o isi nai lo o i tatou lava. (Fili. 2:3, 4) Na a’oa’o e Iesu o le faaalua o le agaga faataulaga, o se tasi o vala autū o la tatou tapua’iga. E faapefea? O le alofa faa-Kerisiano lea e iloa ai soo moni o Iesu, o se tasi lea o vala ua uuna’ia ai i tatou e faaalua le agaga faataulaga. (Ioa. 13:34, 35) Ia mafaufau fo’i i faamanuiaga e tatou te maua ona o le avea

1. Na faapefea ona faataatia e Iesu se faaa’oa’oga lelei atoatoa o le agaga faataulaga?
2. E faapefea ona tatou faaalua le agaga faataulaga, ma aiseā e tatau ai ona tatou faaalua lenā uiga?

E FAAPEFEA ONA E TALI?

E faapefea ona faaaogā le Tusi Paia e iloilo ai i tatou lava, po o tatou aafia i le manatu faapito?

O ā lapata’iga ua tatou a’o-o’o’ina mai i le faaa’oa’oga a le tupu o Saulo?

E faapefea i le faaa’oa’oga a Peteru, ona iloa ai e mafai ona tatou manumalo i faanaunauga manatu faapito?

ma vaega o se 'auuso i le lalolagi aoao, o loo faaaliala le agaga faataulaga.

³ E mafai ona avea le manatu faapito ma fili ilogatā, e faasolosolo mālie ona aveesea ai lo tatou agaga faataulaga. Se'i mafaufau i le auala na faaaliala ai e Atamu ma Eva le uiga manatu faapito. Na iai iā Eva le faanaunauga manatu faapito e fia pei o le Atua. Sa faaaliala fo'i e Atamu lenā faanaunauga ina ia faafiafia ai Eva. (Kene. 3:5, 6) Sa taulau le Tiapolo i le faaliliueseina o i la'ua mai i le tapua'iga moni, ma o loo ia faasoosoina pea tagata e faaaliala le manatu faapito. Sa ia faasoosoina fo'i Iesu e faaaliala lenā uiga. (Mata. 4:1-9) I aso nei, ua faasesēina e Satani le to'atele ma uuna'ia i latou e faaaliala le manatu faapito i le tele o auala. Ia tatou ua'i toto'a atu i lenā vala, auā e mafai e lenā uiga ua taatele ona aafia ai i tatou.—Efe. 2:2.

⁴ E ono faatusa atu le uiga manatu faapito i se 'ele ua amata ona iai i se u'amea, pe afai e taatia le u'amea i se mea e lāina, timuia ma saviligia ai. Pe a lē amana'ia le faifai mālie o le sosolo o le 'ele, o le a matuā faaleagaina ai le u'amea pe lē toe aogā fo'i. I se tulaga talitutusa, e ui e lē mafai ona tatou aveesea i le taimi nei lo tatou tulaga lē lelei atoatoa ma faanaunauga manatu faapito, ae e tatau ona tatou mataala i lamatiaga e tula'i mai, ma tauivi pea i na faanaunauga. (1 Kori. 9: 26, 27) E faapefea ona tatou iloa ua iā i tatou le uiga manatu faapito? E faapefea ona ati-a'e pea lo tatou agaga faataulaga?

FAAOGĀ LE TUSI PAIA E ILOILO AI SE FAAILOGA O LE MANATU FAAPITO

⁵ E faaogā le faata e tatou te vaavaai ai i o tatou foliga. E mafai fo'i ona tatou faa-

3. O le ā e ono aveesea ai lo tatou agaga faataulaga?

4. (a) Pe e mafai ona tatou aveesea faanaunauga manatu faapito i le taimi nei? Faamatala. (e) O ā fesili o le a iloiloina i lenei mataupu?

5. (a) E faapefea ona avea le Tusi Paia e pei o se faata? (Taga'i i le ata i luga a'e o le matua.) (e) O le ā e tatau ona tatou 'alofia pea a iloiloina i tatou lava?

aogā le Tusi Paia e iloilo ai o tatou tagata lilo, ma faasa'o so o se faanaunauga leaga e tatou te ono mātāuina. (**Faitau le Iakopo 1: 22-25.**) Peita'i, e lē mafai ona aogā le faata pe afai e sesē le auala e tatou te faaaogāina ai. O se faata'ita'iga, pe afai e faatopelau ona e tilotilo i ai, e te ono lē iloa lelei ai sina mea o faalētonu ae e tāua. Pe afai fo'i e te tū i autafa o le faata, e te lē iloa atu oe ae e te ono iloa atu ai se isi tagata. I se tulaga talitutusa, e tatou te faaaogā le Tusi Paia e iloilo ai se faanaunauga leaga e pei o le manatu faapito. O lea, e lē tatau ona tatou faitau faatopelau le Tusi Paia, pe faaaogā fo'i e vaavaai ai i masei o isi.

⁶ Ina ia faata'ita'i, atonu e tatou te faitauina le Tusi Paia i aso tā'itasi, ae e lē mafai lava ona iloa atu ni faailoga o le manatu faapito ua amata ona iā i tatou. E faapefea? Ia mafaufau i le tulaga lenei: I le faata'ita'iga a Iakopo i le tamāloa na "**vaavaai** o ia iā te ia lava," na faaaogā e Iakopo le upu Eleni e uiga atu i le iloilo toto'a. Na vaavaai toto'a le tamāloa i le faata, ae na iai lava le faafitauli. Na faapea atili mai Iakopo: "Ona alu ese lea o ia ma ua galo loa ona foliga." Na alu ese o ia mai i le faata e aunoa ma le faaleleia o le faalētonu na vaai i ai. I se faaeseesega, o le tagata e taulau manuia e lē gata e "**vaavaai** toto'a i le tulafono lelei atoatoa," ae e 'tausisi fo'i i ai." O lea, nai lo o le lē amana'ia o le tulafono lelei atoatoa o loo i le Afioga a le Atua, ae e tatau ona "tausisi i ai" ma faaauau ona mulimulitu'i i a'o-a'oga o loo iai. Na fetalai Iesu: "O outou o o'u soo moni pe a outou tumau i a'u upu." —Ioa. 8:31.

⁷ Ina ia mafai ona tatou teena le uiga manatu faapito, e tatau ona e faitauina muamua ma le faaeteete le Afioga a le Atua.

6. E faapefea ona tatou 'tausisi pea' i le tulafono lelei atoatoa?

7. E faapefea ona tatou faaaogā le Tusi Paia e iloilo ai ni faailoga o le manatu faapito?

Atonu e fesoasoani lenā iā te oe, e iloa ai se vala e mana'omia ona e ua'i toto'a atu i ai. E tatau fo'i ona e faia ni sa'ili'iliga loloto. Pe afai ua e mafaufau i se tala faale-Tusi Paia e aogā iā te oe, ia fesili ifo: 'O le ā sa'u gaoioiga e fai i lenei tulaga? Po o le a ou gaoioi i se auala talafeagai?' A o le mea e sili ona tāua, pe a uma ona e manatunatu loloto i mea na e faitau i ai, ia taumafai loa e faatatau. (Mata. 7:24, 25) Se'i vaai pe faapefea ona aogā iā i tatou le tala i le tupu o Saulo ma le aposetolo o Peteru, e faatumau ai lo tatou agaga faataulaga.

LESONA MAI I LE FAAA'O'A'OGA LAPATA'I A LE TUPU O SAULO

⁸ Ua avea le faaa'oa'oga a le tupu o Saulo o se lapata'iga mo i tatou, i le auala e mafai ai e le uiga manatu faapito ona aveesea lo tatou agaga faataulaga. Sa lotomaulalo ma faamaulalo Saulo ina ua amata lana nofoaiga. (1 Samu. 9:21) Na musu o ia e faasala tagata Isaraelu na muimui i lana nofoaiga, e ui lava sa latou lu'ia le pule na tuuina mai e le Atua iā te ia. (1 Samu. 10:27) Na talia e Saulo le ta'ita'iga a le agaga paia o le Atua, e ala i le ta'ita'ia o tagata Isaraelu ma manumalo ai i tagata Amoni. Ina ua mae'a, ona ia viivii lea ma le lotomaulalo Ieova mo le manumalo.—1 Samu. 11:6, 11-13.

⁹ Mulimuli ane, na faataga e Saulo le manatu faapito ma le faamaualuga e faasolo solo ona aafia ai o ia e pei o se 'ele. Ina ua ia manumalo i tagata Amaleka, sa ia faamua-mua ona lava faanaunauga nai lo o le usita'i iā Ieova. O le matape'ape'a o Saulo na ia ave ai le vete nai i lo o le faaumatia o mea uma e pei ona sa faatonuina e le Atua. O lona faamaualuga fo'i sa ia faatū ai se maa faamanatu mo ia lava. (1 Samu. 15:3, 9, 12)

8. O ā uiga sa faaalua e Saulo ina ua amata lana nofoaiga, ma sa faapefea ona ia faaalua na uiga?

9. Sa faapefea ona amata ona atia'e e Saulo le uiga manatu faapito?

Ina ua faailoa atu e le perofeta o Samuēle le lē fiafia o le finagalo o Ieova i lana gaoioiga, sa taumafai Saulo e faia ni faamolemolega. Na ia faapea atu sa ia usita'ia le faatonuga a le Atua ma tuua'ia isi i lana mea sesē. (1 Samu. 15:16-21) E lē gata i lea, o le faamaualuga o Saulo, sa sili atu ai ona tāua iā te ia viiga mai i tagata nai lo o le faafiafiaina o le Atua. (1 Samu. 15:30) E faapefea ona faaaogā le tala iā Saulo e pei o se faata, e fesoasoani e faatumau ai lo tatou agaga faataulaga?

¹⁰ Muamua, o le faaa'oa'oga a Saulo ua faaalua ai e lē tatau ona tatou soona mauintinoā na'uā e faapea, e otometi lava ona tatou faaalua pea le agaga faataulaga. (1 Timo. 4:10) Ia manatua, sa faia e Saulo mea lelei ma maua ai le finagalo malie o le Atua mo sina taimi. Peita'i, sa lē taulau ona ia lia'i ese faanaunauga manatu faapito na amata ona alia'e mai. O lea, sa matuā teena ai e Ieova Saulo ona o lona lē usita'i.

¹¹ Lona lua, e tatau ona mataala i le na o le ua'i atu i mea lelei o loo tatou faia i le olaga, ae lē amana'ia vala e mana'omia ona faaleleia. E tai pei lenā o le tilotilo i le faata ma fiafia i se ofu fou, ae e lē amana'ia o loo palapalā o tatou foliga. E tusa pe e tatou te lē soona mauintinoā na'uā e pei o Saulo, ae e tatau ona tatou tauivi malosī e 'alofia so o se faanaunauga, e ono ta'ita'ia atu ai i lenā ala leaga. Pe a maua ni faasa'oga, ia 'alofia le faia o faamolemolega e pei o Saulo, pe tuua'ia fo'i isi. Ae ia tatou lotomalilie e talia faasa'oga.—**Faitau le Salamo 141:5.**

¹² Ae faapefea pe afai ua tatou faia se agasala matuīā? Na musu Saulo e aveese lona tulaga mamalu, o lea na lē gaoioi ai

10, 11. (a) O ā lesona e tatou te a'oa'oina mai i le faaa'oa'oga a Saulo, ina ia faatumau ai le agaga faataulaga? (e) E faapefea ona tatou 'alofia le mulimuli atu i le ala leaga o Saulo?

12. E faapefea ona fesoasoani le agaga faataulaga iā i tatou pe a faia se agasala matuīā?



Sa faapefea ona tali atu Peteru ina ua mǎe'a ona faasa'oina o ia? Po o le a faapena fo'i le auala e tatou te tali atu ai?
(Taga'i i le palakalafa 15)

e faaleleia lona itu faaleagaga. Peita'i, e fesoasoani iā i tatou le agaga faataulaga e fesaga'ia ai lagona māsiasi ma sa'ilia se fesoasoani. (Faata. 28:13; Iako. 5:14-16) O se faata'ita'iga, na amata ona matamata se tasi o uso i ata matagā taufeusua'iga ina ua 12 ona tausaga, ma e silia i le 10 tausaga na ia faia faalilolilo ai lenei masaniga. Na ia faapea mai: "Sa matuā faigatā ona ou faailoa atu i la'u avā ma toeaina la'u masaniga. Peita'i ina ua ou faailoa atu, sa pei ai ua faamatuu ese atu se avega mamafa. Sa lē fiasia nisi o a'u uō ina ua ou lē toe auuna o le faiva, ma sa matuā tigā o latou loto. E ui i lea, ua ou iloa ua fiasia leova i la'u auunaga i le taimi nei. O le silafaga a leova o le mea sili lea ona tāua iā te a'u."

NA MANUMALO PETERU I LE MANATU FAAPITO

¹³ Sa faaalii e Peteru le agaga faataulaga a o toleniina o ia e Iesu. (Luka 5:3-11) Peita'i, sa tauivi o ia ma faanaunauga manatu faapito. O se faata'ita'iga, na ita o ia ina ua

13, 14. Sa faapefea ona faaalii e Peteru faanaunauga manatu faapito?

manana'o Iakopo ma Ioane e maua ni o la tofiga aloa'ia i le Malo o le Atua faatasi ma Iesu. Atonu na manatu Peteru e tatau ona ia maua se tasi o na tofiga, auā sa fetalai atu Iesu o le a ia maua se tofiga faapitoa. (Mata. 16:18, 19) Po o le ā lava le tulaga, ae sa lapata'ia e Iesu Iakopo, Ioane, Peteru ma isi aposetolo, e faatatau i le manatu faapito ma le taumafai e "pulepuletutū" i o latou uso.—Mare. 10:35-45.

¹⁴ Sa taumafai Iesu e faasa'o manatu o Peteru, peita'i sa iai pea iā Peteru faanaunauga manatu faapito. Ina ua faailoa atu e Iesu i ona aposetolo o le a latou tuulafoa'ia o ia mo sina taimi, na mautinoa na'uā Peteru ma faasilii o ia lava, e ala i le faapea atu iā Iesu e na o ia lava o le a faamaoni pea iā te ia. Peita'i, i lenā lava pō, sa taumafai ai Peteru e puipuia o ia lava ma faafitia faatolu ai Iesu. (Mata. 26:31-33, 69-75) O lea, sa lē tatau ona ia mautinoa na'uā, auā sa lē taulau ona ia faaalii le agaga faataulaga.

¹⁵ E ui sa lē taulau Peteru i na vala, pei-

15. Aiseā e faalaeiauina ai i tatou i le faaa'oa'oga a Peteru?

ta'i ua avea o ia ma faaa'oa'oga e faalaeiau-ina ai i tatou. O ana taumafaiga maumaua'i ma le fesoasoani a le agaga paia o le Atua, na mafai ai ona ia manumalo i ona faanau-nauga sesē, pulea o ia lava ma faaalua le alofa lē manatu faapito. (Kala. 5:22, 23) Sa mafai ona ia onosaia tulaga faigatā sa sili atu ona ogaoga nai lo o mea sa ia tautevateva ai muamua. O se faaa'oa'oga, sa faaalua e Peteru le lotomaulalo ina ua a'oa'ia o ia e Paulo i luma o tagata. (Kala. 2:11-14) E le'i ita faamoemoe Peteru iā Paulo ona e faapea ua ia ta'uleagaina lona tulaga i le va-aiga a tagata. Peita'i, na alofa pea Peteru iā Paulo. (2 Pete. 3:15) E fesoasoani le faaa'oa'oga a Peteru iā i tatou e faaalua ai le agaga faataulaga.

¹⁶ Ia mafaufau pe faapefea ona e tali atu i tulaga faigatā. Ina ua faafalepui-puiina Peteru ma le 'auapose-tolo ma sasa faamo'a-mo'a ona o la latou tala'iga, sa latou fiafia 'ina ua ta'uaogāina i latou ia faaleagaina ona o le suafa o Iesu.' (Gal. 5:41) E mafai fo'i ona e vaai i sauāga o se avanoa e faaa'oa'o ai iā Peteru ma mulimuli i tulagāaa o Iesu, e ala i le faaalua o le agaga faataulaga. (**Faitau le 1 Peteru 2:20, 21.**) E mafai fo'i ona fesoasoani lenei manatu iā te oe pe a maua se a'oa'iga mai i toeaina. Nai lo o le soona tigā o le loto i se a'oa'iga, ia taumafai e faaa'oa'o iā Peteru.—Fai. 7:9.

¹⁷ E te maua fo'i aogā mai i le faaa'oa'oga a Peteru, pe a e tuliloaina sini faaleagaga i se auala e atagia mai ai le agaga faataulaga. Peita'i, ia 'alofia le uiga fiasili pe a tuliloaina na sini. O lea, ia fesili ifo iā te oe lava, 'Po o iā te a'u se faanaunauga e faalautele la'u auaunaga iā Ieova, ona ou te mana'o

16. E faapefea ona tatou faaalua le agaga faataulaga i tulaga faigatā?

17, 18. (a) O le ā e tatau ona tatou fesili ifo ai pe a tuliloaina sini faaleagaga? (e) O le ā e tatau ona faia pe a amata ona atia'e i o tatou loto le uiga manatu faapito?

e sili atu a'u i lo o isi, e pei o le agaga sa iā Iakopo ma Ioane ina ua talosaga atu iā Iesu?'

¹⁸ Pe a e iloa ua amata ona atia'e i lou loto le uiga manatu faapito, ia ōle atu iā Ieova mo le fesoasoani e faasa'o ou uiga manatu faapito, ma taumafai malosi e taula'i e ave le viiga iā Ieova ae lē o oe lava. (Sala. 86:11) Atonu e mafai fo'i ona e tuliloaina sini e lē faigofie ona iloa atu e tagata. O se faata'ita'iga, atonu e te taumafai e faaalua nisi vala o le fua o le agaga e faigatā ona e faaalua. Afai e te naunau e sauniuni mae'ae'a mo au vaega i le sauniga, ae e te lē naunau e fai se sao i le faamamāina o le Maota mo Sauniga, ia fai ma ou sini le faatatauina o le fautuaga i le **Roma 12:16.** —**Faitau.**

¹⁹ Pe a faitau ma le faaeteete le Afioga a le Atua ma iloilo ai o tatou tulaga, o le a pei ai o se faata e tatou te iloa atu se faalētonu, po ua amata fo'i ona tatou aafia i le manatu faapito. Atonu e tatou te lotovaivai ai, peita'i, ia manatunatu i le talafaatusa a Iakopo i le tagata e taulau manuia. E le'i faapea mai Iakopo na vave ona faaleleia e le tagata ni faalētonu na ia vaaia, pe faasa'o mea sesē uma na ia faia. Nai lo lea, na ta'ua e Iakopo sa 'tausisi pea le tagata i le tula-fono lelei atoatoa.' (Iako. 1:25) Sa tāmāu i lona mafaufau mea sa ia vaaia i le faata, ma faaa'uua ona galue e faaleleia. O lea, ia atia'e pea se vaaiga sa'o iā te oe lava ma lou tulaga lē lelei atoatoa. (**Faitau le Failauga 7: 20.**) Ia tausisi pea i le tula-fono lelei atoatoa ma taumafai e faatumau lou agaga faataulaga. E finagalo Ieova e fesoasoani mai iā te oe e pei ona ia fesoasoani i le to'atele o ou uso, o ē e ui ina lē lelei atoatoa, ae e mafai ma o loo latou maua lona finagalo malie ma ana faamanuiaga.

19. E faapefea ona 'alofia le lotovaivai pe a faaaogā le Afioga a le Atua e iloilo ai o tatou tulaga?



Le Auala e Faatumau ai se Vaaiga Sa’o

“Afai e soifua le tagata mo le tele o tausaga, ia olioli o ia i ia tausaga uma.”—FAI. 11:8.

E FAAPEFEA ONA E TALI?

O ā ni lu’i e faafaigatā ai ona faatumauina se vaaiga sa’o?

E faapefea ona tatou faaaogā le Tusi Paia e faatumau ai se vaaiga sa’o?

E faapefea i faaa’oa’oga a le fafine mativa, Elia ma le tusitala o le Salamo 102, ona fesoasoani iā i tatou e atia’e se vaaiga sa’o?

E FINAGALO Ieova ia tatou fiafia, ma ua ia foa’i mai le tele o faamanuiaga e tatou te maua ai le fiafia. O se faata’ita’iga o le meaalofo o le ola. O lea, e mafai ona faaaogā o tatou ola e viia ai le Atua, auā ua ia tosina mai i tatou i le tapua’iga moni. (Sala. 144:15; Ioa. 6:44) Ua faamautinoa mai e Ieova lona alofa iā i tatou, ma fesoasoani mai iā i tatou ia tumau a o auauna iā te ia. (Iere. 31:3; 2 Kori. 4:16) Ua tatou olioli i le taimi nei i se parataiso faaleagaga o loo iai le tele o mea’ai faaleagaga, se ‘auuso alolofa, faapea le faamoemoe pupula mo le lumana’i.

² E ui i le fiafia e maua mai i na faamanuiaga, ae e iai lava nisi auauna faamaoni a le Atua o loo tauivi ma manatu sesē e faatatau iā i latou lava. Atonu e latou te manatu e lē tāua tele i latou ma la latou auaunaga iā Ieova. O ē o loo iai na manatu sesē, e latou te ono manatu o le ola fiafia mo le “tele o tausaga,” ua na o se miti. E latou te lē maua se fiafia ae na o le mafatia. —Fai. 11:8.

³ E ono mapuna a’e manatu sesē faapena ona o mea e le’i

1. O ā faamanuiaga mai iā Ieova ua tatou maua ai le fiafia?
2. O le ā o loo tauivi pea ma nisi o auauna faamaoni a le Atua?
3. O ā mea e mafai ona mapuna a’e ai ni manatu sesē i o tatou lotou?

taulau ai, o ma'i o le tino po o le soifua matua. (Sala. 71:9; Faata. 13:12; Fai. 7:7) E tatau fo'i i Kerisiano uma ona iloa o le loto e taufaa'ole'ole, ma atonu e faasala i tatou e o tatou loto e ui o loo fiafia mai Ieova. (Iere. 17:9; 1 Ioa. 3:20) Ua tuua'ia sesē e le Tiapolo auauna a le Atua. O ē e mafafau e pei o Satani, e latou te ono taumafai e faatalitonu i tatou i le manatu e leai so tatou aogā i le Atua, e pei ona sa manatu ai le tagata lē faatuatua o Elifasa. Peita'i, e pepelo lenā manatu.—Iopu 4:18, 19.

⁴ Ua folafola mai e Ieova, o le a ia faatasi ma i latou o loo "savavali i le vanu e matuā pogisa." (Sala. 23:4) O se tasi o auala ua ia faia ai faapea, e ala i lana Afioga. Ua faaaogā e le Atua le mana o loo i le Tusi Paia "e lepetia ai mea ua matuā mautū," e pei o manatu ma vaaiga sesē. (2 Kori. 10:4, 5) O lea, se'i o tatou iloiloia pe faapefea ona faaaogā le Tusi Paia, e fesoasoani iā i tatou e atia'e ma faatumau ai se vaaiga sa'o. Atonu o le a e maua ai aogā ma iloa ai vala e mafai ona e faalaeiau atu ai i isi.

FAAAOGĀ LE TUSI PAIA E ATIA'E AI SE VAAIGA SA'O

⁵ Na ta'ua e Paulo nisi o auala atonu e fesoasoani iā i tatou e maua ai se vaaiga sa'o. Na ia tima'i atu i le faapotopotoga i Korinito: "Ia tofotofa pea iā te outou po o outou iai i le faatuatua." (2 Kori. 13:5) O "le faatuatua," e faasino atu i talitonuga uma faa-Kerisiano o loo i le Tusi Paia. Pe a o'gatusa a tatou upu ma gaoioiga ma mea o loo a'oa'o mai i le Tusi Paia, o lona uiga ua tatou "iai i le faatuatua." O le mea moni, e lē mafai ona tatou filifili po o fea talitonuga e usita'ia, a o fea talitonuga

4. O le ā o le a tatou iloiloia i lenei mataupu?

5. O le ā e tatau ona tatou faia ina ia maua ai se vaaiga sa'o?

e lē usita'ia. Nai lo o lea, e tatau ona tatou usita'ia a'oa'oga uma faa-Kerisiano o loo i le Tusi Paia.—Iako. 2:10, 11.

⁶ E te ono faatalatū e iloilo oe lava, aemaise pe a e manatu e lē mafai ona e ausia tapulaa faa-Kerisiano. Peita'i, e sili atu ona tāua le silafaga a Ieova ma ona manatu nai lo o i tatou. (Isa. 55:8, 9) E su'esu'e e Ieova ona tagata tapua'i ina ia iloa ai o latou uiga lelei ma fesoasoani i ai, ae e lē ina ia ta'usalaina i latou. E mafai ona iloa e tāua i tatou i le silafaga a Ieova, pe a faaaogā le Afioga a le Atua e iloilo ai i tatou 'po o tatou iai i le faatuatua.' Ua fesoasoani lea e suia ai so o se manatu e faapea, e leai sou aogā i le silafaga a Ieova, auā ua faamautinoa mai i le Tusi Paia e faapea: E matuā tautele oe i le silafaga a Ieova. E pei lenā mea moni o le susulu mai o le lā e faamalamalama ai se potu pogisa.

⁷ O se tasi o auala lelei e iloilo ai i tatou lava, o le manatunatu loloto lea i faaa'oa'oga a tagata faamaoni o loo i le Tusi Paia. Ia faatusatusa oe i o latou tulaga ma faaloga, ma vaai pe faapefea ona e gaoioi pe a tuu oe i o latou tulaga. Se'i o tatou tilofa'ia ni faaa'oa'oga se tolu, pe faapefea ona e faaaogā le Tusi Paia e iloa ai o loo e "iai i le faatuatua," ma atia'e ai se vaaiga sa'o iā te oe lava.

LE FAFINE MATIVA

⁸ Na vaaia e Iesu se fafine mativa i le malumalu i Ierusalem. E fesoasoani lana faaa'oa'oga iā i tatou ina ia faatumau ai se vaaiga sa'o, e ui e tapulaa mea e mafai ona tatou faia. **(Faitau le Luka 21:1-4.)** Sa

6. Aiseā e tatau ai ona iloilo i tatou lava 'po o tatou iai i le faatuatua'? (Taga'i i le ata i luga a'e o le matua.)

7. E faapefea ona tatou maua aogā mai i faaa'oa'oga a tagata faamaoni o loo i le Tusi Paia?

8, 9. (a) Sa faape'i le tulaga o le fafine mativa? (e) O ā ni manatu sesē sa ono iai i lenei fafine?



O ā ni lesona e te a'oa'oina mai i le faaa'oa'oga a le fafine mativa?
(Taga'i i le palakalafa 8-10)

mana'omia ona onosaia e le fafine mativa le maliu o lana tane, faapea se si'omaga na pulea e ta'ita'i lotu, o ē na "faoa fale o fafine ua oti a latou tane," nai lo o le fesoa-soani i tagata vaivai. (Luka 20:47) O le mativa tele o lenei fafine, sa ia foa'i atu ai i le malumalu ni tupe itiiti sa mafai ona maua e se tagata faigaluega i ni nai minute e faigaluega ai.

⁹ Manatu i faalogona o le fafine mativa, ina ua ulu atu i le lotoā o le malumalu ma ana tupe iti e lua. Pe sa mafaufau o ia i le itiiti o lana foa'i, pe a faatusatusa i se foa'i atonu na ia faia a o soifua lana tane? Pe na māsiasi o ia i le vaai atu i le tetelē o foa'i a isi na muamua atu iā te ia? Pe sa ia taumānatu pe e tāua lana foa'i? E tusa pe sa iā te ia na faalogona, ae sa ia faia pea le mea sili e na te mafaia mo le tapua'iga moni.

¹⁰ Sa faaalialia e Iesu le tāua iā Ieova o le

10. Sa faapefea ona faaalialia e Iesu le tāua iā Ieova o le fafine mativa?

fafine ua oti lana tane faapea lana foa'i. Na fetalai o ia: 'E sili atu mea ua lafo e lenei fafine nai lo o i latou uma.' E ui sa fefiloi faatasi le foa'i a lenei fafine ma foa'i a isi, ae sa viiviiia e Iesu lenei fafine. E le'i iloa e le 'auteutupe na vāai i nei tupe iti e lua, le tāua tele iā Ieova o na tupe iti ma lē na faia le foa'i. E sili atu ona tāua le silafaga a Ieova, nai lo o manatu o isi tagata po o faalogona o le fafine mativa. Pe e mafai ona faaaogā lenei tala e tofotofu ai oe lava, po o e iai i le faatuatua?

¹¹ O lou tulaga e mafai ona aafia ai mea e te foa'i atu iā Ieova. E faatapulaa le taimi e mafai ai e nisi ona tala'ia le tala lelei, ona o le tulaga matua po o le lē atoatoa o le malosi o le tino. Pe e tataua ona latou taumānatu pe mana'omia ona lipoti itula na latou faaaluina i le faiva? E tusa pe e lē faatapulaa mea e mafai ona e faia, ae atonu e te mafaufau e lē o tele sou sao o faia, pe a

11. O ā lesona e tatou te a'oa'oina mai i le tala e faatatau i le fafine mativa?

faatusatusa i le tele o le taimi o loo faaalu e auauna a le Atua i tausaga ta'itasi e tapua'i ai iā te ia. Peita'i, ua tatou a'oa'oina mai i le tala i le fafine mativa, e mātauina ma faatāua e Ieova mea o loo tatou faia mo ia, aemaise pe a feagai ma tulaga faigatā. Pe a toe mafaufau i lau tapua'iga iā Ieova i tausaga ua mavae, pe sa iai se itula na e faaaluina sa mana'omia ai ni taumafaiga faapitoa? Afai o le tulaga lenā, e mautinoa e tāua iā Ieova lenā itula na e faaaluina. Pe a e faia le mea sili i le auaunaga iā Ieova e pei o le fafine mativa, e mautinoa e iai māfuaaga tataua e te talitonu ai, ua e "iai i le faatuatua."

"IA E AVEESE LO'U OLA"

¹² Sa faamaoni ma malosi le faatuatua o le perofeta o Elia iā Ieova. Peita'i, sa iai se taimi na ia lotovaivai ai ma 'ai'oi atu ai iā Ieova e faapea: "Ua lava lea! Ieova e, ia e aveese lo'u ola." (1 Tu. 19:4) Atonu e manatu i latou e le'i tofo i na mafatiaga, o le tatalo a Elia ua na o ni 'upu e soonafai.' (Iopu 6:3) Peita'i, sa faaleo atu e Elia ona faalogona moni. Mātau, e le'i otegiaina e Ieova Elia ina ua mana'o e aveese lona ola, ae sa Ia fesoasoani atu iā te ia.

¹³ Aiseā na oo ai na faalogona iā Elia? Muamua atu, sa ta'imua Elia i se mea na tupu i Isaraelu na faamaonia ai o Ieova o le Atua moni. O lenā mea na tupu na fasiotia ai perofeta e 450 a Paala. (1 Tu. 18:37-40) E ui sa naunau Elia e toe fo'i mai tagata o le Atua i le tapua'iga mamā, peita'i e le'i tupu lenā mea. Na auina atu e le masiofo leaga o Iesepela se fe'au iā Elia, e faailoa atu ai o le a fasiotia o ia. O le fefe o Elia na sola atu ai i se toafa i le itu i saute o lauelele o Iuta.—1 Tu. 19:2-4.

¹⁴ A o iai na o ia i le toafa, na taumānatu

12-14. (a) Sa faapefea ona aafia Elia i ona manatu sesē? (e) Aiseā atonu na oo ai na faalogona iā Elia?

Elia e leai se aogā o lana galuega faaperofeta. Na ia faapea atu iā Ieova: "E lē sili atu a'u i o'u augātamā." I ona lava manatu, e lē tāua o ia iā Ieova ma isi tagata, ma e leai sona aogā e pei o efuefu ma ponaiivi o ona tuua ua maliliu.

¹⁵ Sa tāua pea Elia i le silafaga a Lē e ona le malosi uma lava, ma faaauau ona ia faamautinoa atu iā Elia lenā mea moni. Na auina atu e le Atua se agelu e faamalosia Elia. Na ia saunia fo'i mea'ai ma meainu ina ia maua ai pea e Elia le malosi, mo lana malaga mo aso e 40 i le itu i saute o le Mauga o Horepa. Na faasa'oina fo'i ma le agalelei e le Atua le manatu sesē o Elia, e faapea e leai se tagata Isaraelu na tumau faamaoni iā Ieova. Na talia e Elia faaeaga fou na avatu e le Atua iā te ia. O le fesoasoani a Ieova na ia maua ai aogā, ma toe maua le malosi e faia ai lana galuega faaperofeta.—1 Tu. 19:5-8, 15-19.

¹⁶ E fesoasoani le faaa'oa'oga a Elia e iloa ai po o tatou iai i le faatuatua, ma uuna'ia ai i tatou ia iai se vaaigna sa'o. Muamua, manatu i auala na faatumauina ai oe e Ieova. Atonu na fesoasoani atu se toaia po o se isi Kerisiano ta'umatua ina ua e mana'omia se fesoasoani. (Kala. 6:2) Po ua faafouina faaleagaga oe e ala i le Tusi Paia, lomiga ma sauniga a le faapopotoga? Pe a e maua aogā mai i se tasi o na auala, ia manatua Lē na auala mai ai le fesoasoani, ma faafetai atu iā te Ia i le tatalo.—Sala. 121:1, 2.

¹⁷ Lona lua, ia manatua, e mafai ona faasesēina i tatou i manatu sesē. Peita'i, e sili atu ona tāua le silafaga a le Atua nai lo

15. Sa faapefea ona faamautinoa atu e le Atua iā Elia, e tāua pea o ia i lana silafaga?

16. O ā nisi o auala ua faatumauina ai i tatou e le Atua?

17. O le ā le mea e sili ona tāua iā Ieova mai i ana auauna?

o tatou manatu. (**Faitau le Roma 14:4.**) E lē faamasinoina e Ieova i tatou i mea ua tatou faataunuuna, ae e tāua iā te ia lo tatou tuutoina atu faapea lo tatou faamaoni iā te ia. E pei o le tulaga o Elia, atonu e sili atu mea ua e faia mo Ieova, nai lo o mea na e mafaufauina. Atonu na iai nisi i le faapotopotoga na iai ni aafiaga lelei mai iā te oe, po o nisi fo’i i le oganuu na faalogo i le upu moni ona o au taumafaiga.

¹⁸ O le manatu mulimuli, ia vaai i o tatou faaeaga ta’itasi mai iā Ieova o se faamaoniga o lona finagalo malie mai iā i tatou. (Iere. 20:11) I le pei o Elia, atonu e tatou te lagona le lotovaivai ona o le lē fua mai o la tatou auaunaga, pe ua foliga mai fo’i ua lē taulau nisi o o tatou sini faaleagaga. Peita’i, e iai se faaeaga ua tatou maua, e sili atu nai lo o se isi lava mea ua tatou mauaina. O lenā faaeaga, o le tala’ia o le tala lelei ma tauaveina le suafa o le Atua. O lea, ia tutumau faamaoni, auā e pei ona fetalai Iesu, o le a mafai ai ona e ‘olioli faatasi ma lou matai.’—Mata. 25:23.

“O LE TATALO A LĒ UA MAFATIA”

¹⁹ Sa “mafatia” le tusitala o le Salamo 102 a lē o mea matuitui o le tino, o le lotomafatia. E le’i maua fo’i e ia le malosi e fesaga’ia ai ona faafitauli. (Sala. 102, ulutala) E pau le mea na ia mafaufau i ai o ona tigā, le tuua to’atasi, ma ona lava faalogona. (Sala. 102:3, 4, 6, 11) I lona manatu, na finagalo Ieova e tuulafoa’ia o ia.—Sala. 102:10.

²⁰ Peita’i, sa mafai pea ona faaogā le

18. O le ā ua mafai ona faamaonia i faaeaga ua tuuina mai e Ieova iā i tatou?

19. O ā tulaga na feagai ma le tusitala o le Salamo 102?

20. E faapefea ona fesoasoani le tatalo i se tasi o loo tauivi ma manatu sesē?

ola o le faisalamo e viivii ai Ieova. (**Faitau le Salamo 102:19-21.**) E tusa ai ma le Salamo 102, e oo fo’i tigā i ē ua iai i le faatuatua ma faafaigatā ai ona ua’i atu i se isi lava mea. Sa manatu le faisalamo i ona faalogona, e pei “o se manulele ua tuua to’atasi i le tauluga o le fale.” Sa ia manatu e na o faafitauli lava ua si’omia ai o ia. (Sala. 102:7) Pe a mapuna a’e ni faalogona faapena iā te oe, ia sasaa atu na faalogona iā Ieova e pei o le faisalamo. E fesoasoani le tatalo iā te oe a o e tauivi ma manatu sesē, ma aua ne’i popole pe a e mafaufau e sesē ou manatu. Ia e maufaa-tuatuaina le folafolaga lenei a Ieova: “E li-liu mai lava o ia i le tatalo a ē ua aveesea a latou mea uma, e lē inosia fo’i e ia la latou tatalo.”—Sala. 102:17.

²¹ Ua faailoa mai fo’i i le Salamo 102 le auala e ono mafai ai ona e maua se vaaiga sa’o. Na faia faapea e le faisalamo e ala i le ua’i atu i le la faiā ma Ieova. (Sala. 102: 12, 27) Na faamāfanafanaina o ia i le iloa, e faatumauina pea e Ieova ona tagata a o feagai ma faigatā. O lea, pe a faafaigatā pea ona e faia le mea sili i le auaunaga i le Atua ona o manatu sesē, ia tatalo iā Ieova. Ia ōle atu iā te ia e faafofoga mai i lau tatalo ina ia e maua ai se mapusaga i ou mafatiaga, faapea fo’i le ‘faalauiloaina atu o le suafa o Ieova.’—Sala. 102:20, 21.

²² E mafai ona tatou faaogā le Tusi Paia e faamaonia ai o loo tatou iai i le faatua-tua, ma e tāua i tatou i le silafaga a Ieova. E lē mafai ona tatou aveesea manatu sesē uma po o le lotovaivai ona o lenei faiga o mea. Peita’i, e mafai e i tatou uma ta’ito’atasi ona faafiafiaina Ieova ma maua le faaolataga, e ala i le tumau ma le faamaoni i le auaunaga.—Mata. 24:13.

21. E faapefea i se tasi o loo tauivi ma manatu sesē, ona maua pea se vaaiga sa’o?

22. E faapefea ona tatou faafiafiaina Ieova?



Tapua'iga a le Aiga : Pe e Mafai Ona Fiafia le Auala e Faia Ai?

Na faapea mai se tamā mai i Pasili, o le fiafia tele o lona aiga i la latou tapua'iga i nisi pō, a lē taofia e toetoe oo la latou tapua'iga i le vaeluaga o le pō. Na faapea mai se tane mai i Iapani, e lē popole lona atalii e sefulu tausaga i le taimi, ma mana'o ai e faaaau la latou tapua'iga a le aiga. Aiseā? Na ia faapea atili mai: "Sa faalaeiauina ai o ia, ma o le isi lenā māfuaaga sa ia fiafia ai."

E lē o tamaiti uma e naunau ma fiafia i le tapua'iga a le aiga. Aiseā? Na faapea mai se tamā mai Togo: "E tatau ona fiafia le auala e fai ai le tapua'iga iā Ieova." O le auala fo'i la lenā e tatau ona fai ai tapua'iga a le aiga. O le tele o aiga e "matuā fiafia" i a latou tapua'iga, e tai pei ona ta'ua i le tusi o Isaia.—Isa. 58: 13, 14.

Ua iloa e tane Kerisiano, e maua le fiafia i le tapua'iga a le aiga pe a faia i se si'omaga

filemu. O Ralf o se tane e to'atolu ona afafine ae to'atasi lona atalii. Na ia faapea mai e fai la latou tapua'iga e pei o se talanoaga faasama-samanoa, ae e lē pei o se su'esu'ega, ma e faa-aofia ai i latou uma. Atonu o se lu'i i nisi taimi le taumafai ia fiafia ma faa-aofia tagata uma i le talanoaga. Na faapea mai se tasi tinā: "O lo'u lēlavā i le tele o taimi, e masani ona lē maua ai le fiafia i la matou tapua'iga a le aiga e pei ona ou naunau i ai." E faapefea ona fo'ia lenā lu'i?

FETUUTUUNA'I MA FESUISUIA'I

Na faapea mai se tamā e to'alua lana fanau i Siamani: "Sa tatau ona matou fetuutuuna'i." Ae na faapea mai Natalia o se tinā e to'alua lana fanau: "O le mea e sili ona tāua i lo matou aiga, o le fesuisuia'i o le auala e fai ai la matou tapua'iga." O le tele o aiga e vaevae la latou tapua'iga i vaega eseese. Na faapea

mai Cleiton mai Pasili, o se tamā e to’alua lana fanau talavou: ‘O le fesuisuia’i o le auala e faia ai le su’esu’ega e mafai ona faaofia ai tagata uma.’ O le vaevae o le taimi e fai ai le tapua’iga, e mafai ai ona ua’i atu mātua i mana’oga o le fanau, aemaise pe afai e eseese o latou tausaga. E mafai e mātua ona taulima mana’oga o sui ta’itasi o le aiga ma fetuutuuna’i, i le auala e filifilia ai le mataupu ma le auala e faia ai.

O le ā ua faia e nisi aiga ina ia faia ai se suiga i la latou tapua’iga? O nisi aiga e amata i le usuina o pese iā Ieova. Na faapea mai Juan mai Mekisikō: ‘O le faia o lenā vala, e saunia ai se amataga lelei ma saunia ai o matou mafaufau mo le tapua’iga.’ O lea, e filifili e lona aiga pese e fetai ma le mataupu o le a talanoaina.

O le tele o aiga e faitauina faatasi se vaega o le Tusi Paia. O nisi aiga e tofi tagata e faitauina vaega a tagata eseese o se tala o le Tusi Paia, ina ia fesuisuia’i ai le faiga o la latou tapua’iga. Na faamatala e se tamā mai i Iapani, o le faitauina o le Tusi Paia i lea auala, “sa pei e lē masani ai i le taimi muamua na fai ai.” Peita’i sa fialia ona atalii e to’alua i le vaaia o o la mātua o loo latou fialia faatasi. O nisi aiga e latou te faatinoina tala faale-Tusi Paia. Na faapea mai Roger, o se tamā e to’alua ona atalii i Aferika i Saute, e masani ona ta’ua e tamaiti se manatu e faatatau i se tala faale-Tusi Paia, ae e lē o iloa e mātua.

O se tasi o auala e mafai ona fai ai se suiga, o le galulue faatasi lea e faia se galuega faatino, e pei o le fausia o le vaa o Noa po o le malumalu o Solomona. O na faatinoga e aofia ai ni sa’ili’iliga. O se faata’ita’iga, sa faia e se teineitiiti e lima tausaga mai i Asia ma ona mātua, ma le tinā o lona tamā, se taaloga e faatatau i malaga faamisionare a Paulo. O nisi aiga e faia ni taaloga e faavae mai i tala o loo i le tusi o Esoto. Ua faapea mai Donald, o se talavou e 19 tausaga mai Togo, o le fesuisuia’i o le auala e fai ai la latou tapua’iga, “ua faaleleia ai la latou tapua’iga faapea lo latou aiga.” Pe mafai ona e mafaufau i se poloketi e mafai ona fialia uma ai lou aiga e faatino?

E TATAU ONA FAIA SAUNIUNIGA

E ui e tāua le fesuisuia’i ma le fetuutuuna’i ina ia fialia le auala e faia ai le tapua’iga a le aiga ma maua

ai aogā, peita’i, e tatau lava ona faia sauniuniga. O nisi taimi e lē lavavā tamaiti, o lea e tatau ai i le tane ona mafaufau i le mataupu o le a talanoaina, ma faaalu se taimi e sauniuni lelei ai. Na faapea mai se tasi tamā, “Pe a ou sauniuni lelei, e tofu sao uma tagata i le talanoaga.” E vave ona faailoa atu e se tamā i Siamani i lona aiga, le mataupu e talanoaina i le vaiaso e sosoo ai. I se tasi aiga i Benin, pe a fua-fua le tamā o le aiga e matamata se DVD faale-Tusi Paia i le tapua’iga a le aiga, e vave ona ia avatu fesili i lana fanau lāiti e to’aono e sauniuni ai. O lea, o sauniuniga e mafai ona faaleleia ai le auala e faia ai le tapua’iga a le aiga.

Pe a iloa e le aiga le mataupu o le a talanoaina i le tapua’iga a le aiga, e mafai ona latou talanoa ai a o faagasolo le vaiaso ma faaosofia ai lo latou nau-nau. Pe a tofia i tagata ta’itasi ni a latou vaega i le tapua’iga a le aiga, o le a atili ai ona naunau o ia i le tapua’iga a lona aiga.

IA FAIA E LĒ AUNOA

O le tele o aiga, o se lu’i le faia e lē aunoa o la latou tapua’iga a le aiga.

O le to’atele o mātua e galulue mo le tele o itula e tausia mana’oga faaletino o le aiga. O se faata’ita’iga, e tuua e se tamā i Mekisikō le fale i le ono i le taeao, ae faato’ā fo’i mai i le valu i le afiafi. E iai fo’i nisi taimi e ono mana’omia ai ona fetuuna’i le taimi e fai ai le tapua’iga a le aiga, ina ia faia ai nisi mea faaleagaga.

Peita’i, e tatau lava ona tatou maumaua’i e faia e lē aunoa le tapua’iga a le aiga. Na faapea mai Lois e 11 tausaga mai Togo: “E ui e tuai ona fai la matou tapua’iga a le aiga i nisi taimi ona o se mea e lē ma’alofia, peita’i e faia lava e lē aunoa.” O nisi aiga atonu e faatulaga la latou tapua’iga e fai i le amataga o le vaiaso. Ae a iai se mea e lē ma’alofia e tula’i mai, e mafai ona toe faatulaga i se isi aso o le vaiaso.

O le faaupuga “tapua’iga a le aiga,” ua faailoa mai ai o lea vala o se vaega o lau tapua’iga iā Ieova. O lea e tatau ai i sui uma o le aiga ona ofo atu se taulaga o “tama’i povi taanoa” iā Ieova. O lona uiga ia vivii atu iā Ieova i vaiaso ta’itasi. (Ho. 14:2, fpl.) Atonu e avea fo’i o se taimi mo sui ta’itasi o le aiga e olioli ai, “auā o le olioli ma iā Ieova, o lo outou malosi lea.”—Nee. 8:9, 10.



Lunaite Setete o Amerika

O LE TAPUA'IGA A LE
AIGA E TATAU ONA:

Fiafia

Fetuutuuna'i le Taimi
e Fai ai

Fesusuia'i Mataupu

Sauniuni Lelei

Faia e lē Aunoa



Sri Lanka

Aferika i Saute





Ia Faamamaluina Tagata Matutua

“Ia e faaaloalo i le tagata ua loa le soifua.”

—LEVI. 19:32.

O LE Ā LAU TALI?

O le ā le silafaga a Ieova i tagata matutua faamaoni?

O ā tiute tauave ua iai i fanau a mātua ua matutua?

E faapefea ona faamamaluina e Kerisiano ē ua loa le soifua i le faapotopotoga?

E LE'I finagalo Ieova e mafatia tagata ona o aafiaga o le soifuaga matua. Nai lo o lea, sa finagalo ia maua e tagata le soifua mālōlōina lelei atoatoa i le lalolagi Parataiso. Peita'i, ua “ōi faatasi pea ma tigā faatasi foafoaga uma” i le taimi nei. (Roma 8:22) O le ā sou manatu, o ā ni faalogona o Ieova a o silasila mai i aafiaga ua oo i tagata ona o le agasala? E faanoanoa ona o le to'atele o tagata matutua ua tuulafoa'ia, i taimi e sili ona latou mana'omia ai le fesoasoani.—Sala. 39:5; 2 Timo. 3:3.

² E talisapaia e tagata o Ieova le iai o tagata matutua i le faapotopotoga. E tatou te maua aogā mai i lo latou atamai, ma e faalaeiauina fo'i i tatou i lo latou faatuatua. O nisi o na auauna pele o o tatou tauaiga. Ae e tusa po o i latou o ni o tatou tauaiga pe leai, e tatau lava ona faamautinoa o loo tauasia lelei i latou. (Kala. 6:10; 1 Pete. 1:22) E tatou te maua aogā i le iloiloina o le silafaga a le Atua i tagata matutua. O le a tatou iloiloina fo'i le tiute tauave a sui o le aiga faapea le faa-

1. O le ā le tulaga faanoanoa ua aafia ai tagata i aso nei?
2. Aiseā e talisapaia ai e Kerisiano le iai o tagata matutua i le faapotopotoga?

potopotoga, i le tausiana o tagata matutua.

“AUA E TE LAFOA’IINA A’U”

³ Ua faapea mai le Salamo 71:9: “Aua e te lafoa’iina a’u ina ua ou toeaina; aua e te tuua a’u ina ua mou atu lo’u malosi.” E foliga mai o Tavita na tusiaina na upu. Na auauna o ia iā Ieova mai i lona talavou se’ia oo ina toeaina, ma sa faaaogā o ia e Ieova e faia mea mata’ina. (1 Samu. 17:33-37, 50; 1 Tu. 2:1-3, 10) E ui sa tele mea na faia e Tavita mo Ieova, ae na faasolo ina matua o ia. O lea, sa ia iloa e tatau ona talosaga atu iā Ieova ina ia tausia o ia.—**Faitau le Salamo 71:17, 18.**

⁴ O le to’atele i aso nei e talitutusa ma le tulaga o Tavita. E ui ua faasolo ina matutua ma fesaga’ia fo’i “aso e malaia ai,” ae o loo faaauau ona latou vivii atu i le Atua i le tele e mafai ai. (Fai. 12:1-7) O le to’atele o i latou ua lē mafai ona toe faia le tele o mea sa mafai ona fai i le taimi muamua, e aofia ai la latou faiva. Peita’i, e mafai pea ona latou talosaga atu iā Ieova e faamanuia ma tausia i latou. E mautinoa e nei auauna matutua e faafogaina e Ieova a latou tatalo. O na tatalo e talitutusa lava ma faalagona sa iai iā Tavita.

⁵ Ua faailoa manino mai i le Tusi Paia e matua tāua iā Ieova ana auauna matutua, ma e faatalitalia fo’i ana auauna ia faamamaluina i latou. (Sala. 22:24-26; Faata. 16:31; 20:29) Ua faapea mai le Levitiko 19:32: “Ae ia e tula’i i luma o ē ua ulusinā, ia e faaaloalo i le tagata ua loa le soifua, ma ia e mata’u i lou Atua. O a’u o Ieova.” I vaitaimi o le Tusi Paia,

3, 4. (a) O le ā na talosaga atu ai le faisalamo o le Salamo e 71 iā Ieova? (e) O le ā e mafai ona talosaga atu ai auauna matutua faamaoni iā Ieova?

5. O le ā le silafaga a Ieova i tagata matutua?

sa avea le faamamaluina o tagata matutua o se tiute tauave tāua, ma e faapena fo’i i aso nei. Ae faapefea le tausiana o i latou? O ai e ana lenā tiute tauave?

TIUTE TAUAVE A LE AIGA

⁶ Ua faapea mai le Tusi Paia: “Ia e āva i lou tamā ma lou tinā.” (Eso. 20:12; Efe. 6:2) Sa faaalua e Iesu le tāua o lenā poloa’iga, e ala i le ta’usalaia o Faresaio ma tusiupu, o ē na teena le tausia o o latou mātua. (Mare. 7:5, 10-13) Na faataatia e Iesu se faaa’oa’oga lelei. Ina ua lata ina maliu o ia i le laau e faapuapuagatia ai, sa ia tuuina atu le tausiga o lona tinā atonu ua maliu lana tane, i lona soo faapelepeleina o Ioane.—Ioa. 19:26, 27.

⁷ I le tusi a Paulo iā Timoteo, na ia uuna’ia ai Kerisiano ina ia tausia o latou aiga. (**Faitau le 1 Timoteo 5:4, 8, 16.**) Na ia ta’ua lenā ta’iala ina ua ia faamatalaina po o ai e mafai ona maua le fesoasoni tautupe mai le faapotopotoga. Na ia faamanino atu o le tiute tauave a fanau, o fanau a fanau ma isi tauaiga, le tausia o fafine ua maliliu a latou tane. O le faia faapea, o lē a lē faaee atu ai se avega i le faapotopotoga. I aso nei, e faamaonia lo tatou alolofa i le Atua, e ala i le faamautinoa o loo maua e o tatou tauaiga mea o loo latou mana’omia.

⁸ E tatau i fanau Kerisiano ua matutua ona faamautinoa ua tausia mana’oga faaletino o o latou mātua. E ui sa talanoa Paulo e faatatau i tauaiga “talitonu,” ae e lē tatau fo’i ona tuulafoa’ia mātua e lē

6. O le ā le faaa’oa’oga na faataatia e Iesu mo le tausiana o mātua?

7. (a) O le a le ta’iala na aumaia e Paulo mo le tausiga o mātua? (e) O le ā se isi mea na ta’ua e Paulo?

8. Aiseā ua atamai ai le lē aumaia e le Tusi Paia o ni ta’iala ma’oti, e faatatau i le tausiga o mātua a matutua?

upu moni. E eseese auala e tausia ai mātua, auā e eseese uma tulaga o mea. E eseese mana’oga, o uiga ma le soifua mālōlōina o tagata uma. O nisi tagata matutua e to’atele a latou fanau, a o nisi e na o le to’atasi. O nisi e mafai ona maua ni faamanuiaga mai le malo, a o nisi e lē mafai. E eseese fo’i mana’oga o ē o loo mana’omia le tausiga. O lea, e lē o se faiga alofa pe atamai, ona faitioina le auala o loo taumafai se tasi e tausia ai ona tauaiga ua matutua. E mai lava i aso o Mose, e faamanuia e Ieova so o se faai’uga e faavae mai le Tusi Paia.—Nu. 11:23.

⁹ E faigatā ona saunia le fesoasoani mana’omia pe a nonofo eseese fanau ma mātua. Atonu e faafuase’i ona aafia le soifua mālōlōina o mātua, ona ua pa’ū, gau se ponaivi, po o se isi lava mǎfuaaga, ma ua mana’omia ai ona asiasi atu iā i latou. O lea, atonu e mana’omia ai se tausiga mo sina taimi puupuu, po o se taimi umi fo’i.*

¹⁰ E feagai fo’i ma filifiliga faigatā nisi o loo auauna faataimi atoa, ua ō ese mai i o latou aiga ona o faaeaga. E vāai i latou o loo auauna i Peteli, misionare ma ovasia femalagaa’i, i o latou faaeaga tautele o se faamanuiaga mai iā Ieova. Ae pe a mama’i mātua, e latou te ono mafaufau, ‘E tatau ona ou tuua lo’u faaeaga ae toe fo’i i le aiga e tasi mātua.’ O lea, e atamai ona tatou tatalo ma manatunatu loloto, po o mana’omia moni ma po o le mea fo’i lea o loo manana’o ai mātua. E lē tatau ona vave tuua e se tasi faaeaga i

* I le mataupu o sosoo mai, o le a saunia mai ai ni ta’iala atamai mo tagata matutua ma a latou fanau.

9-11. (a) O ā filifiliga faigatā ua fesaga’i ma nisi? (Taga’i i le ata i luga a’e o le matua.) (e) Aiseā e lē tatau ai ona vave tuua e fanau le auaunaga faataimi atoa? Ia faata’ita’i.

le auaunaga, aemaise lava pe a lē mana’omia. Po o le a umi se taimi e faalētonu ai le soifua mālōlōina o mātua? Pe e mafai ona fesoasoani nisi mai le faapotopotoga a mātua i le tausiga o i la’ua? —Faata. 21:5.

¹¹ O se faaa’oa’oga, e to’alua se ‘auuso na auauna i ni vaipanoa e mamao ese mai i le aiga. O le isi sa auauna ma lana avā o ni misionare i Amerika i Saute, a o le isi sa galulue ma lana avā i le ofisa ulu i Brooklyn, i Niu Ioka. Sa mana’omia e mātua o lenei ‘auuso se fesoasoani. O lea, na latou asia ai ma a la avā o la’ua mātua i Iapani, ina ia iloa se auala e fesoasoani ai. Na filifili le ulugalii misionare e tuua le la faaeaga ae toe fo’i i le aiga. Peita’i, na telefoni atu iā i la’ua le sooupu a le ‘autoeaina o le faapotopotoga a o la mātua. Sa talanoaina e toeaina le mataupu, ma sa latou manana’o fo’i e faaaauu pea le ulugalii misionare i lo la faaeaga. Na talisapaia e toeaina le auaunaga a le ulugalii, ma sa latou taumafai e faia mea uma e tausia ai o la mātua. Sa talisapaia e le aiga lenei tausiga alofa.

¹² Po o ā lava taumafaiga mo le tausiga o mātua ua matutua, e tatau lava ona faamautinoa e faamamaluina ai le suafa o Ieova. E mautinoa e tatou te lē fia pei o ta’ita’i lotu i aso o Iesu. (Mata. 15: 3-6) E tatou te manana’o e faamamaluina Ieova ma le faapotopotoga i a tatou filifiliga.—2 Kori. 6:3.

MATAFAIOI A LE FAAPOTOPOTOGA

¹³ E lē o tagata uma e mafai ona feso-

12. O le ā e tatau ona faamautinoa e aiga Kerisiano, pe a faia filifiliga e faataui i le tausiga o ē ua matutua?

13, 14. E faapefea ona faamaonia mai le Tusi Paia, e mafai e le faapotopotoga ona fesoasoani i le tausiga o ē ua matutua?

soani i auauna faataimi atoa i le auala na ta'ua muamua. Peita'i, i se mea na tupu i le ulua'i senituri, ua faaalua ai e tatau i le faapotopotoga ona faia mea uma e latou te mafai ina ia fesoasoani ai i Kerisiano matutua. Ua faapea mai le Tusi Paia e faatatau i le faapotopotoga i Ierusalem, e 'leai se tasi o i latou na mafai i se mea.' E lē faapea na matua tele ni a latou meafaitino. E foliga mai e iai nisi e le'i tele ni a latou meafaitino na iai, peita'i, 'na tufatufaina mea i tagata ta'ito'atasi e tusa ai ma le mea e mana'omia e ia.' (Gal. 4:34, 35) Ae e iai se isi mea na tupu mulimuli ane. Na maua se lipoti 'ua lē faaafonia nisi fafine ua oti a latou tane, i le tufatufaina o mea'ai i aso fai soo.' O lea, na tofia ai e le 'auapose-tolo nisi o tane agavaa, e faamautinoa ua lava mea e saunia mo fafine ua feoti a latou tane. (Gal. 6:1-5) I le Penetekoso 33 T.A., e to'atele na asiasi mai i Ierusalem na avea ma Kerisiano, ma na nonofo ai pea i inā ina ia atia'e lo latou itu faaleagaga. E ui o le tufatufaina o mea'ai o se faatulagaga lē tumau, a o le filifiliga a le 'auapose-tolo ua faailoa mai ai, e mafai e le faapotopotoga ona fesoasoani i uso ma tuafāfine matutua.

¹⁴ Na faamatala atu e Paulo iā Timoteo, le taimi e talafeagai ai i le faapotopotoga ona fesoasoani i mana'oga faaletino o fafine Kerisiano ua oti a latou tane. (1 Timo. 5:3-16) Na faalaeiauina fo'i e Iakopo Kerisiano ina ia tausia tamaiti ua mātuaoti, fafine ua feoti a latou tane ma isi, pe a mana'omia le fesoasoani. (Iako. 1:27; 2:15-17) Na tusi Ioane i le 1 Ioane 3:17: "O sē ua tele ana meafaitino i lenei lalolagi ma ua vaai atu i lona uso ua lē tagolima o ia, a ua lē faaalua e ia le alofa faapelepele iā te ia, pe faapefea la ona



E faapefea ona fesoasoani le faapotopotoga pe a tupu se faalavelave faafuase'i?

(Taga'i i le palakalafa 15, 16)

tumau iā te ia le alofa o le Atua?" Pe afai e mafai e tagata ta'ito'atasi ona fesoasoani i ē mana'omia le tausiga, pe e lē faapena fo'i la le tulaga o le faapotopotoga?

¹⁵ I nisi atunuu, e saunia e faigāmalo penisione ma le tele o auaunaga mo tagata matutua. (Roma 13:6) Ae i nisi atunuu e leai ni auaunaga faapena. O lea, e faalagolago le fesoasoani e saunia e tauaiga ma le faapotopotoga, i le tulaga o mea. E mafai ona aafia le auala e tausia ai e le fanau Kerisiano o latou mātua, pe afai e mamao le mea e nonofo ai. E tatau

^{15.} O a nisi o vala e mafai ona fesoasoani ai i uso ma tuafāfine matutua?

ona fesooota'i lelei le fanau ma toeaina o le faapotopotoga a o latou mātua, ina ia latou malamalama uma i le tulaga o le aiga. O se faaa'oa'oga, e mafai e toeaina ona fesoasoani i ē matutua, e ala i le faailoa iā i latou o nisi auaunaga ma faamanuiaga e mafai ona maua mai le malo. E mafai fo'i e toeaina ona fesoasoani e ala i le faailoa atu i le fanau o nisi vala e faatatau i o latou mātua, e pei o vailaau ma fualaau. E fesoasoani tele na galuega agalelei. O lea, pe afai e iai se tasi e nofo latalata e vaavaaia ma fesoasoani i mātua ua matutua, o le a mafai ona faaitiitia ai nisi faaaitiitia, ma popolega o le aiga o loo nonofo i isi vaipanoa.

¹⁶ O le alolofa mo ē matutua i le faapotopotoga, ua faaalu ai e nisi Kerisiano o latou taimi ma le malosi e fesoasoani ai iā i latou. Ua latou tausia i latou e pei lava o ni tagata moni o o latou aiga, ma e latou te feauaua'i ai ma nisi i le faapotopotoga. O nisi ua lē mafai ona auai i le auaunaga faataimi atoa ona o o latou tulaga, o lea ua latou fesoasoani ai e tausia mātua ua matutua. O le faia faapea, ua mafai ai ona faaauau pea le auaunaga a fanau a nei mātua. Ma'eu se agaga lelei ua faaalua e na uso! E ui lava i le fesoasoani mai o isi, ae o le tiute tauave lava a fanau le fai o le mea sili e latou te mafai, e tausia ai mātua ua matutua.

FAAMAMALUINA Ē MATUTUA E ALA I UPU FAALAEIAU

¹⁷ O le faatumauina o se vaaiaga paleni, o le a faafaigofie ai tulaga faigatā mo tagata matutua ma ē o loo fesoasoani iā i

16. Ua faapefa ona fesoasoani nisi Kerisiano i tagata matutua i le faapotopotoga?

17, 18. O le ā le vaaiaga e mafai ona maua ai le fiafia i le tausiga o ē matutua?

latou. O nisi taimi, ona o le soifua matua e faigofie ai ona aafia se tasi i le lotovaivai ma le lotomafatia. O lea, e tatau ona e taumafai malosi e faamamalu ma faalaeiauina uso ma tuafāfine matutua, e ala i talanoaga e atia'e ai. E tatau ona faamālō atu i tagata matutua ona o lo latou faamaoni iā leova. E lē faagaloina e leova galuega uma sa faia e ana auauna matutua, ma e tatau fo'i ona tatou faia faapea. —**Faitau le Malaki 3:16; Eperu 6:10.**

¹⁸ E lē gata i lea, e mafai ona tuuititia faigatā mai lea aso i lea aso pe a fai se tala mālīe i le taimi talafeagai. (Fai. 3: 1, 4) O le to'atele o tagata matutua e lē soona tagisā i mea e manana'o ai. E latou te iloa o le a fiafia tagata e asiasi ma ua'i atu iā i latou, pe afai e latou te faaalua pea uiga tusaafia. E masani ona faapea mai i latou na asiasi i ē matutua: "Pe a ou asiasi atu e faalaeiau i sa'u uō matua, e i'u ane ua sili atu ai ona faalaeiauina a'u."—Faata. 15:13; 17:22.

¹⁹ Ua loa ona tatou moomoo i le aso e faai'uina ai mafatiaga ma aafiaga o le tulaga lē lelei atoatoa. Ae i le taimi nei, e tatau i auauna a le Atua ona taula'i atu pea i le faamoemoe o le ola e faavavau. O le faatuatua i folafolaga a le Atua, e faamalosi ai i tatou i nei aso faigatā. O le faatuatua ua 'tatou lē faavaivai ai, ae e ui lava ina tauau ina uma atu lo tatou tagata i fafo, ae ua faafouina pea lo tatou tagata i totonu i lea aso ma lea aso.' (2 Kori. 4:16-18; Epe. 6:18, 19) O le ā se isi vala e mafai ona fesoasoani i le tiute tauave a i latou o loo tausia tagata matutua? O le a iloiloina i le mataupu o sosoo mai nisi o ta'iala aogā.

19. O le ā e fesoasoani e faamalosi ai talavou ma ē matutua i nei aso faigatā?



Ia Tausia Ē Matutua

“Le fanau e, aua ne’i o tatou alolofa tau o le upu ma le gutu, ae e ala fo’i i gaioiiga ma le faamaoni.”—1 IOA. 3:18.

ATONU e faigatā le vaai atu i ou mātua sa malolosi, ua vai-vai ma lē mafai ona latou tausia i latou lava. Atonu na pa’ū le toeaina po o le loomatua ma gau ai se ponaivi, ua vale-vale matua po ua mae’a fo’i le taotoga o se ma’i tigāina. Ae i le isi itu, e faigatā fo’i i tagata matutua ona talia suiga i o latou tulaga ma le soifua mālōlōina, aemaise lava pe a itiiti mea ua mafai ona latou faia. (Iopu 14:1) E faapefea ona tatau fesoasoani atu? E faapefea ona tausia i latou?

² Na ta’ua i se lomiga e faatatau i le tausia o tagata ua matutua, e ui e faigatā ona talanoa i faafitauli o le soifua matua, ae o aiga e sauniuni mamao, o le a mafai ona latou faia ni filifiliga lelei pe a tula’i mai se faafitauli. Ia manatua, e lē mafai ona ‘alofia faafitauli ona o le soifua matua. O lea, e tāua ai i aiga ona nofosauni. E faapefea ona galulue faatasi le aiga i le faia o filifiliga faigatā?

1, 2. (a) O ā lu’i ua fesaga’ia e le tele o aiga, ma o ā fesili ua lāgā ai? (e) E faapefea ona nofosauni mātua ma fanau mo tulaga faigatā?

O LE Ā LAU TALI?

E faapefea ona sauniuni mātua ma fanau mo “aso e malaia ai”?

O ā tulaga e ono mana’omia ai e mātua le fesoasoani a fanau?

O ā ni auala e mafai ona e fesoasoani ai i se tasi o loo tausaina ni mātua ua matutua?

IA NOFOSAUNI MO “ASO E MALAIA AI”

³ E iai le taimi e lē mafai ai e tagata matutua ona tausia i latou lava. **(Faitau le Failauga 12:1-7.)** Pe a tupu lenā mea, e tatau ona filifili faatasi e mātua ua matutua ma le fanau, le tausiga e sili ona lelei ma gafatia fo’i. O lea, e tāua ai ona talanoa le aiga po o le ā le ituaiga o tausiga e mana’omia, ma e faapefea fo’i ona galulue faatasi. E tatau i tagata uma ona femalamalamaa’i ma ia sa’oloto e talanoa.* Po o mafai pea e mātua ona tausia i latou lava? (Faata. 24:6) O nisi e mafai ona fesoasoani i le saunia o le tausiga i aso ta’itasi, ae fesoasoani isi i le totagiina o vailaau ma fualaau. E tatau ona iloa e tagata uma o latou tiute tauave, ma a o faagasolo taimi e mafai ona fesuia’i na tiute tauave.

⁴ A o amata lau tausiga, ia faaalu se taimi e malamalama lelei ai i le gasegase a ou mātua. Afai o aafia i se ma’i e faasolosolo ina tigāina, ia taumafai e iloa le isi laasaga o le a oo i ai lona ma’i. (Faata. 1:5) Ia faafesoota’i ni ofisa o le malo e saunia auaunaga mo tagata matutua i lou vaipanoa. A o e mafaufau pea i na tulaga faigatā, atonu o le a oo iā te oe faalogona faanoanoa ma le lē mautonu. I taimi faapena, ia talanoa atu i sau uō ma faatuatuaina. Ae o le vala e sili ona tāua, ia sasaa atu ou faalogona iā Ieova. O le a ia foa’i mai iā te oe le filemu e mafai ai ona e talia ma fesaga’ia na tulaga faigatā.—Sala. 55:22; Faata. 24:10; Fili. 4:6, 7.

* I nisi aganuu, o se faiga masani le nonofo faatasi o mātua ma fanau.

3. O le ā e tatau ona faia e aiga pe afai ua mana’omia e mātua le fesoasoani? (Taga’i i le ata i luga a’e o le matua.)

4. O fea e mau ai e le aiga se fesoasoani pe a suia le tulaga o mea?

⁵ O se faiga atamai mo mātua ua matutua ma o latou aiga, ona fuafua mamao po o le ā le auala e tausia ai i latou. O se faaa’oa’oga, atonu e latou te manatu e sili atu pe a nonofo faatasi mātua ma se tasi o le fanau, tausia i fale mo tagata matutua, po o se isi lava auala. O le faia faapea, o le a mafai ai ona sauniuni le aiga mo “faafitauli ma mea e tigā ai,” pe a oo mai le soifua matua. (Sala. 90:10) O aiga e lē fuafua mamao, e faafuase’i ona latou faia se filifiliga pe a alia’e mai se faafitauli. Ua faapea mai se tagata atamai: “O le taimi sili lava lenā ona leaga e faia ai se filifiliga.” A vave ona faia se faai’uga, atonu o le a lē mautonu ai le aiga, pe e lē malilie uma ai fo’i. Peita’i, o le fuafua mamao o le a faigofie ai ona fetuutuuna’i i suiga.—Faata. 20:18.

⁶ Atonu e faigatā ona talanoa i mātua e faatatau i suiga i le aiga. Peita’i, ua ioe le to’atele i le tāua o nei talanoaga a o faagasolo taimi. Aiseā? E faigofie atu ai ona talanoa i mataupu faigatā, faalologo lelei, ma faia fuafuaga a o le’i tula’i mai faafitauli. Ia talanoa i se auala lelei ma māfana ma ia faia fo’i ma le alofa. Atonu e manana’o ē matutua e nonofo na o i latou i le umi e mafai ai. O lea, o le talanoa o mātua i fanau i le auala e manana’o e tausia ai i latou i se taimi o i luma, o le a fesoasoani lea i le taimi e fai ai se filifiliga.

⁷ A o faia le talanoaga, e tatau i mātua ona faamatala atu i le aiga o la mana’oga, ma le aofa’iga o a la tupe e mafai ona faa-

5. Aiseā e lelei ai ona fuafua mamao e faatatau i le auala e tausia ai mātua ua matutua?

6. Aiseā e tāua ai le talanoa i le auala e tausia ai mātua a o faasolo ina matutua?

7, 8. O le ā e tatau ona talanoa i ai le aiga, ma aiseā?

aogā. O lea, pe a iai se taimi ua lē mafai ai ona faia e mātua na faai’uga, e mafai lava e fanau ona faataunuu o la mana’oga. Atonu o le a taumafai fanau e fai mea uma e latou te mafaia, ina ia latou lē soona aiā tele ai i mea e faia e mātua. (Efe. 6:2-4) O se faaa’oa’oga, pe e te mana’o e tou te nonofo ma se tasi o le fanau, po o se isi auala o loo e mafaufau i ai? Ia taumafai e malamalama ma manatua, e ese fo’i manatu o isi sui o le aiga. E lē gata i lea, e umi se taimi e fetuutuuna’i ai i manatu eseese.

⁸ O le fuafua mamao ma le lelei o fesoota’iga, o le a ‘alofia ai faafitauli. (Faata. 15:22) Ia talanoa i lou aiga i togafitiga faafoma’i e te mana’o i ai. Pe a faia nei talanoaga, e ao ona talanoa i mataupu e pei o togafitiga e faaaogā ai lou toto, vaega ninii o le toto, ma filifiliga e tusa ai o le faaaogāina o masini ina ia faaaauai ai ona ola, pe afai ua tugā le ma’i ma ua lē mafai ona mātua. O le faia faapea, o le a iloa ai e lou aiga le mea e te mana’o e fai e tusa ai o togafitiga faafoma’i. Ia filifili se tasi e te maufaatua-tuaina e fai ma ou sui, e faataunuu lou mana’o i togafitiga faafoma’i, pe afai ua e aafia i se tulaga ua lē mafai ai ona e toe iloa se mea. E tatau i tagata matutua ma ē o loo tausia i latou, faapea ē ua fai ma sui i togafitiga faafoma’i, ona iai ni kopi o le faai’uga tusitusia a le tagata e faata-tau i togafitiga faafoma’i. E tuufaatasi e nisi tagata a latou faai’uga e faatatau i togafitiga, mavaega ma isi pepa tāua e faatatau i le inisiua, teugātupe ma isi lava faamaumauga.

FESAGA’IA O SUIGA

⁹ O le tele o taimi, e taumafai le aiga e

9, 10. O ā nisi vala e ono mana’omia ai e mātua le fesoasoani a fanau?



E mafai ona talanoa faatasi le aiga i le auala e fo’ia ai faafitauli (Taga’i i le palakalafa 6-8)

aua nei aiā tele i meafai a tagata matutua. Pe afai o loo mafai e mātua ona saunia a latou lava mea’ai, faamamā mea uma, manatua taimi e inu ai a latou vai ma fualaau, ma fesoota’i lelei pea ma isi, e lē tatau la i le fanau ona taumafai e pu-lea mea e faia e mātua. Peita’i, a o faagasolo taimi, e tatau i fanau ona fai ni fetuuna’iga pe a amata ona faigatā i mātua ona savavali, faia faatau, ma ua amata fo’i ona galogalo mea.

¹⁰ O tagata matutua e masani ona lē mautonu pe lotovaivai fo’i. Atonu ua amata ona lē lelei le faalogo, vaai, manatuaina o mea, po ua faigatā fo’i ona faa-aogā le falelētā’ua. A alia’e na faafitauli, e tatau loa i mātua ua matutua ona sa’ili se fesoasoani faafoma’i, atonu e mafai ona togafitia nisi o na faafitauli. Peita’i, atonu e mafai ona tausolomua fanau e ave mātua e vaai le foma’i. E ono mafai fo’i e le fanau ona talanoa atu i foma’i ma isi, faatumu pepa ma isi lava vala, ina

ia faamautinoa e maua e mātua le tausiga mana’omia.—Faata. 3:27.

¹¹ Afai e lē toe fo’i i se lelei le soifua mālōlōina o mātua, e tatau ona toe fai ni suiga i le tausiga o i latou. O le a faigofie ona latou fetuutuuna’i, pe afai o ni suiga lāiti. Ae afai e te nofo mamao ese mai i ou mātua, atonu e mafai e se tuaoi po o se isi uso ona asiasi i ai, ona faamatala atu lea iā te oe o lo la tulaga. Po o mana’omia e mātua le fesoasoani i le gaseseina o mea’ai ma le tapenaina o le fale? Po o le faia o ni suiga lāiti i le fale, o le a faigofie ai mo mātua ona faamālū, feoa’i solo i totonu o le fale ma faia isi mea? Atonu fo’i e mana’omia se isi e faigaluega e tausia mātua i lo la fale. Peita’i, afai e lē o toe saogalemu le nonofo na o i la’ua, e tatau la ona saunia se isi tausiga tumau. Po o le ā lava le tulaga, e tatau lava ona sa’ilia muamua ni auaunaga o loo maua i le vaipanoa.*—**Faitau le Faataoto 21:5.**

AUALA E FESAGA’IA AI LU’I

¹² E tatou te manana’o e saogalemu ma malupuipua o tatou mātua, ona o lo tatou alolofa iā i latou. E filemu o tatou mafaufau, pe a iloa o loo lelei ona tausia i latou. Peita’i, o le to’atele o fanau matutua ua nonofo valavala ma mātua. O lea, e faaaogā ai e nisi aso mālōlō e asiasi ma fesoasoani ai iā i latou, ma fai fe’au ua lē mafai ona latou toe faia. E faa-

* Afai o loo nonofo lava na o mātua, ia faamautinoa e iai ni ki a tagata maufaatuatuaina o loo tausia i la’ua, ina ia mafai ai ona latou ō i le fale pe a tula’i mai se faavelave.

11. O le ā e mafai ona fai ina ia faafaigofie ai i mātua ona fetuutuuna’i i suiga?

12, 13. O le ā ua faia e fanau ua nonofo mamao ese e tausia ai o latou mātua?

alia le alolofa o fanau i mātua, e ala i le telefoni atu i ai e lē aunoa, tusia ni tusi pe lafo atu fo’i ni imeli.—Faata. 23:24, 25.

¹³ E mafai lava ona e filifilia se auala e tausia ai ou mātua i aso ta’itasi, e tusa lava pe e mamao ese le vaipanoa o loo e nofo ai. Afai e Molimau a Ieova ou mātua, e mafai ona e talanoa i toeaina o le la faapotopotoga, ma talosaga i ai mo se fautuaga. Ae o le vala e sili ona tāua, ia tatalo iā Ieova e faatatau i ou mātua. (**Faitau le Faataoto 11:14.**) Peita’i, e tusa pe e lē o ni Molimau a Ieova ou mātua, e tatau lava ona e “āva i lou tamā ma lou tinā.” (Eso. 20:12; Faata. 23:22) E lē tusa filifiliga e faia e aiga uma. O nisi e filifili e nonofo faatasi ma mātua, pe nonofo latalata fo’i iā i latou. Peita’i, e lē o taimi uma e talafeagai ai lenā tulaga. O nisi mātua e lē manana’o e nonofo faatasi ma le fanau. E latou te manana’o e nonofo lava na o i latou, ona e lē manana’o e avea i latou ma avega mamafa i a latou fanau. O nisi mātua e latou te gafatia fo’i le totogiina o se tasi e tausia i latou i o latou lava fale.—Fai. 7:12.

¹⁴ O le tele o aiga, o le tagata o le fanau e nofo latalata i mātua e tele lava ina tausiana i la’ua. Peita’i, e tatau fo’i ona taumafai e paleni, e lē gata e tausia manā’oga o mātua ae faapea fo’i o o latou lava aiga. E tapulaa le taimi ma mea e mafai ona fai e tagata uma. Afai ua suia le tulaga o le tagata o loo tausia mātua, e tatau i le aiga ona toe iloilo le tulaga o mea. Po ua tele na’uā tiute tauave a le tagata o loo tausiana mātua? Pe mafai ona fesoasoani isi o le fanau i le sauniaina o le tausiga?

14. O ā faafitauli e ono fesaga’ia e lē o loo tausiana mātua?

¹⁵ O le a faasolo ina mamafa le avega a lē o loo tausia mātua, pe afai e mana’omia e mātua le fesoasoani i taimi uma. (Fai. 4:6) E taumafai fanau alolofa e faia le mea sili e latou te mafaia mo mātua, ae e lē o se galuega e faigofie. O lea, e tatau ai i lē o loo tausiaiaina mātua ona malamalama lelei i le tulaga o mea, ma sa’ili se fesoasoani. O le mauaina o le fesoasoani mai lea taimi i lea taimi, o le a mafai ai pea ona tausia i latou e aunoa ma le tau vaavaaia i se fale mo tagata matutua.

¹⁶ E faigatā le vaai atu i aafiaga tigā ona o le soifua matua. E lagona i nisi taimi e i latou o loo tausiaiaina mātua le faanoanoa, popole, ita, atuatuvaie po o le lē mautonu fo’i. I nisi taimi, e faia ai e mātua ni faaupuga faatigā pe e lē lotofaafetai fo’i. A tutupu na mea, ia taumafai e aua ne’i tigā lou loto. Na faapea mai se tasi tagata atamai, a tigā o tatou loto, ia talia ma aua ne’i iai ni ou lagona nofosalala. Ia talanoa i lau paaga, se tauaiga po o sau uō maufaatuatuaina e faatatau i ou faalogona. O talanoaga faapena, e te malamalama ai i ou faalogona ma taumafai e maua pea le paleni.

¹⁷ Atonu e iai le taimi ua lē mafai ai ona tausia i le aiga sē e pele iā i tatou e tusa ma ona mana’oga, ona filifili lea o le aiga e tausia o ia i le fale mo tagata matutua. E toetoe lava o aso uma e asiasi ai se tuafafine i lona tinā i le fale mo tagata matutua. Na ia faapea mai: “E le’i mafai ona matou toe tausia Tinā i le 24 itula i le aso. E le’i faigofie fo’i ona fai le filifiliga

15. O le ā e tatau ona fai ina ia ‘alofia ai le mamafatū o le avega a lē o loo tausia mātua?

16, 17. O ā lu’i e ono fesaga’ia e fanau a o tausia mātua ua matutua, ae e faapefea ona fesaga’ia na lu’i? (Taga’i fo’i i le pusa “Tausia Ē Matutua Ona o le Alofa.”)

TAUSIA Ē MATUTUA ONA O LE ALOFA

E iai se tuafafine e fā itula e malaga ai i le nofoaga o loo nonofo ai ona mātua. E fesoasoani o ia i isi ona uso e to’atolu e tausia o latou mātua, ma ua aafia lona tinā i le ma’i o le tau galogalo o mea. Na ia faapea mai: “Ua ou talitonu i le atamai o fetalaiga a Iesu: ‘Aua ne’i outou popole mo le aso a taeao, auā e iai fo’i popolega o le aso a taeao.’ E lē mafai ona taofia le ma’i. O lo matou faanaunauga, ia faia le mea sili i aso tā’itasi e lagona ai pea e mātua le saogalemu. Ou te talisapaia le tele o mea lelei sa la faia mo i matou. O lea, ou te naunau ai e tausia i la’ua.” E mautinoa le fiafia o le finagalo o Ieova i lenā uiga lelei.—Mata. 6:34; Sala. 68:19.

e ave o ia i le fale mo tagata matutua. Sa matuā faigatā lava. Peita’i, e pau lea o le auala na tausia ai o ia i toe masina o lona soifuaga, ma sa ia talia lava.”

¹⁸ E lē faigofie le tiute tauave o le tausia o mātua ua matutua. E lē tutusa uma auala e aogā i aiga uma, pe a tausia ē ua matutua. Ae o le fuafua mamao, galulue faatasi o se aiga, lelei o fesoota’iga, ae sili ai o le tatalo iā Ieova, o le a mafai ai ona faataunuu lea tiute tauave ma faamamaluina ai mātua. O le faia faapea o le a e maua ai le fiafia, auā ua e avatu iā i latou le tausiga na latou mana’omia. **(Faitau le 1 Korinito 13:4-8.)** Ae o le vala e sili ona tāua, e mautinoa o le a maua ai le filemu o le mafaufau ma faamanuiaga a Ieova.—Fili. 4:7.

18. O le ā le faamautinoaga ua maua e i latou o loo tausiaiaina mātua ua matutua?

O LAU UPU

‘Ioe ma le Leai’

Manatu i se mea e ono tupu: Ua fuafua se toeaina o se sui o le Komiti o Mataupu Tau Falema’i, e tala’i faatasi ma se uso talavou i le taeao o le Aso Sa. I lenā lava taeao na telefoni mai ai se uso i le toeaina, o loo faanatinati atu lana avā i le falema’i ona o se faalavelave tau taavale. Na talosaga mai le uso i le toeaina mo se fesoasoani, e sa’ili se foma’i e faia se togafitiga e aunoa ma le faaaogāina o le toto. O lea, na tolopō ai e le toeaina le la fuafuaga ma le uso talavou, ina ia mafai ona ofo atu se fesoasoani talafeagai i le aiga.

Manatu i se isi mea e ono tupu: Na valaaulia e se ulugalii se tinā nofofua ma lana fanau e to’alua i le la faapotopotoga, ina ia latou tafafao i se afiafi. Na matuā fiafia le fanau ina ua ta’u atu i ai e le tinā, ma na latou tulimata’ia lenā aso. Peita’i, a o le’i oo i lenā afiafi, na faailoa atu e le ulugalii i le tinā o le a lē taunuu la latou fuafuaga, ona o se tuatuaigia e lē ma’alofia. Mulimuli ane, na iloa e le tinā le māfuaaga na lē taunuu ai la latou fuafuaga. Ina ua mǎe’a ona valaaulia o ia, sa valaaulia e ni uō a le ulugalii i la’ua e latou te tafafao i lenā lava afiafi, ma sa la taliaina.

E tatau iā i tatou o Kerisiano ona tausisi i a tatou upu, ma e lē tatau ona tatou faapea atu ‘ioe ona toe fai atu lea e leai.’ (2 Kori. 1: 18) Peita’i, e tusa ai ma faata’ita’iga e lua na ta’ua, e lē tutusa le tulaga o mea i nisi taimi. Atonu e iai taimi e tatau ai ona tolopō se fuafuaga na faataatia. Na feagai le aporetolo o Paulo ma se tulaga faapena.

TUUA’IA PAULO E LĒ FAAMAONI

I le 55 T.A. a o iai Paulo i Efeso a o faagasolo lana malaga faamisionare lona tolu, na ia fuafua ai e ui atu i le Sami o Ainea e aga’i atu i Korinito, ona malaga atu ai lea i Maketonia. A o aga’i e toe fo’i atu i Ierusalem, na fuafua o ia e asiasi atu i le faapotopotoga i Korinito mo le taimi lona lua, ina ia aoao mai a latou mealofa mo le ‘aunuso i Ierusalem. (1 Kori. 16:3) E faamaonia lenā fuafuaga i le 2 Korinito 1:15, 16: “Na ou mautinoa fo’i lenei mea, o lea na ou fuafua muamua ai ou te alu atu iā te outou, ina ia maua se mea e tou te olioli faalua ai, pe a uma ona ou afe atu iā te outou i la’u malaga i Maketonia, ma toe fo’i mai Maketonia iā te outou, ona outou momoli lea o a’u i Iutaia.”

E foliga mai na faailoa atu e Paulo lana fuafuaga i uso i Korinito, e ala i se isi tusi na ia tusia muamua. (1 Kori. 5:9) E le’i leva



ona uma ona tusia e Paulo lenā tusi, ae ia maua se lipoti mai i le aiga o Keloe e faapea, ua matuā feeseesea’i le faapotopotoga. (1 Kori. 1:10, 11) Na filifili Paulo e toe sui lana ulua’i fuafuaga, ma ia tusia ai le tusi o le 1 Korinito. Na tusia ma le agalelei e Paulo fautuaga ma faasa’oga ma faailoa atu fo’i ua sui lana fuafuaga. Na ia faailoa atu o le a malaga muamua i Maketonia ona sosoo lea ma Korinito.—1 Kori. 16:5, 6.*

E foliga mai ina ua maua e uso i Korinito lana tusi, na tuua’ia e “apometolo silisili” o lenā faapotopotoga Paulo e faapea, e lē faamaoni ona o le lē tausisi i ana upu. Na fesili atu Paulo: “Ae ina ua ou faia lea fuafuaga, pe na ou manatu māmā ea i ai? O mea na ou fuafua e fai, pe na ou fuafua ea e tusa ma manatu faaletagata, ma ou fai atu ‘Ioe, o lea lava’ ona ou toe fai atu lea e ‘Leai, e leai lava?’”—2 Kori. 1:17; 11:5.

E tatou te ono fesili, Pe na “manatu māmā” moni lava Paulo i le mataupu? E leai. O le upu ua faaliliuina mai ai le upu “māmā,” e uiga atu i le femoumoua’i, e pei ua lē faamaoni se tagata i ana folafolaga. Ina ua fesili atu Paulo “pe na ou fuafua ea e tusa ma manatu faaletagata?” sa tatau ona manino ai i manatu o Kerisiano i Korinito, o le suia o le fuafuaga a Paulo e lē faapea ai o ia o se tagata lē faamaoni.

Na matuā faasa’o e Paulo a latou tuua’iga ina ua tusi e faapea: “Ae e faamaoni le Atua, na matou lē fai atu iā te outou, ‘Ioe, ona toe fai atu lea e Leai.’” (2 Kori. 1:18) E mautinoa sa matuā naunau Paulo mo le lelei o uso ma tuafāfine i Korinito ina ua suia lana fuafuaga. I le 2 Korinito 1:23, na suia e Paulo lana ulua’i fuafuaga ‘ina ne’i atili ai ona mafatia’ uso i Korinito. Na tuu i

* E le’i umi talu ona mae’a ona tusia e Paulo le tusi muamua i Korinito, ona ui atu lea i Teroa e malaga aga’i atu i Maketonia, lea na ia tusia ai le tusi lona lua i Korinito. (2 Kori. 2:12; 7:5) Mulimuli ane, ona ia asiasi atu lea i Korinito.

ai e Paulo le avanoa e faasa’o ai mea a o le’i feiloa’i mai i latou. A o iai Paulo i Maketonia, sa faamatala atu i ai e Tito le avea o lana tusi ma uuna’iga lelei na faalia ai e uso le salamō. O le mea lenā sa faatalitalia e Paulo ma na matuā faafiafiaina ai o ia.—2 Kori. 6:11; 7:5-7.

O IESU O LE FAAMAONIGA

O le tuua’iga e faapea o Paulo e lē faamaoni, na ono manatu ai e lē mafai ona maufaatuatua lana galuega tala’i pe afai na lē tausisi o ia i ana upu i aso faisoo. Peita’i, na faamanatu atu e Paulo i uso i Korinito, sa ia tala’i atu iā i latou e faatatau iā Iesu Keriso. “O Keriso Iesu le Alo o le Atua, lea na matou tala’iina atu iā te outou, o a’u, ma Siluano, ma Timoteo, e le’i avea o ia ma Ioe ma toe Leai, ae na o le Ioe lava.” (2 Kori. 1:19) Pe sa iai se vala na lē faamaoni ai Iesu Keriso, o lē na faasa’o’o i ai Paulo? E leai. Sa tautala ma le faamaoni Iesu i lona olaga atoa ma i lana faiva fo’i. (Ioa. 14:6; 18:37) Pe afai sa moni ma faamaoni mea uma na tala’ia e Iesu, ma o le fe’au fo’i lenā sa tala’ia e Paulo, o lona uiga la sa maufaatuatua fo’i le tala’iga a le apometolo.

O Ieova o “le Atua faamaoni.” (Sala. 31:5) E faamaonia lenā mea ina ua tusi Paulo, “po o le ā lava le tele o folafolaga a le Atua, a ua Ioe uma ona o ia,” po o Keriso. O le faamaoni atoatoa o Iesu a o iai i le lalolagi, e tatou te mautinoa ai e maufaatuatua folafolaga a Ieova. Na faapea atili mai Paulo: “E ala iā te ia, ua tatou faapea atu ai ‘Amene’ i le Atua ina ia tatou faamaluina o ia.” (2 Kori. 1:20) O Iesu o le “Amene,” po o lē e faamaonia ai o le a faataunuu moni lava folafolaga uma a Ieova le Atua.

E pei lava ona faamaoni pea Ieova ma Iesu, sa faapena fo’i ona faamaoni pea Paulo i ana upu. (2 Kori. 1:19) Sa faamaoni

Paulo ma e na te le'i faia ni folafolaga e tusa ai ma "manatu faaletagata." (2 Kori. 1: 17) Nai lo lea, sa ia 'savali i la le agaga.' (Kala. 5:16) O le auala sa ia feutaga'i ai ma isi, sa atagia ai lona matuā naunau mo lo latou lelei. Sa tausisi o ia i lana Ioe.

PO O AVEA LAU UPU IOE MA IOE?

I aso nei, ua fai ma masani a tagata le fai o folafolaga, ona sui lea pe a tula'i mai ni faafitauli lāiti pe ua iai fo'i se mea e sili atu ona manaia e auai i ai. E lē masani ona tausisi tagata i le "ioe" pe a feagai ma mataupu faapisinisi, e tusa pe ua mae'a ona faia se maliega tusitusia. E to'atele ua lē o toe faatūaina le tautoga o le faaipoipoga o se feagaiga mo le olaga atoa. Nai lo lea, o le faateleina o talagā faaipoipoga, ua faaalua ai e manatu le to'atele o tagata o le faaipoipoga o se faatasiga e lē tumau, ma e faigo-fie ona faamuta.—2 Timo. 3:1, 2.

Po o aveia lau upu Ioe ma Ioe? E pei ona faatomua atu i lenei mataupu, e te ono suia se fuafuaga na e faia ona o tulaga lē ma'alofia ae e lē faapea ua e lē faamaoni. Ae afai ua e faia se folafolaga po o se maliega, e tataua ona e faia le mea sili ina ia faatau-nuu lenā folafolaga. (Sala. 15:4; Mata. 5:37) O lou faia faapea, o le a mātaulia ai oe o sē e maufaatuatuaina, o sē e savali i ana upu ma e tautala faamaoni i taimi uma. (Efe. 4: 15, 25; Iako. 5:12) Pe a iloa e tagata e te faamaoni i meafai i aso uma, atonu o le a latou naunau ai e faalogo mai pe a e faailoa atu le upu moni e faatatau i le Malo o le Atua. O lea, ia faamautinoa o loo tatou tausisi i la tatou Ioe.



E mafai ona maua fua kopi o lenei mekasini ma isi lomiga mai le www.jw.org/sm



E mafai fo'i ona e faitau i le Faaliliuga a le Lalolagi Fou i nisi gagana i le Initaneti

Taga'i i le www.jw.org/sm pe faaogā le code



w14.03/15-SM
131212